

熙朝名臣實錄

熙朝名臣實錄卷十五

秣陵 焦 竑 輯

太保王忠肅公

事 長陵 獻陵 景陵  
裕陵 景帝 茂陵

公名翱字九臯鹽山人永樂十三年進士先是北人舉進士者輒在後是年初會試貢士北京公兩試皆高等上喜召見賜食改翰林庶吉士授大理左寺正註誤遷行人宣德元年西楊薦陞行在山東道御史十年陞僉都御史正統元年鎮守江西未幾巡浙江拊善摧奸吏民畏愛四年松番用兵不效公出贊理六年鎮陝西七年東虜殺掠吏民師出輒北遼東西震動且撼漁陽公提督軍務留撫

遼東十二年、出塞破虜有功、陞右副都御史、十四年、陞左、  
是年秋、虜分寇廣寧、清野困之、虜退去、景泰三年、召還臺、  
尋加太子太保、是年建州酋李滿住上番書、乞留公遼東、  
不許、會南蠻寇兩廣、兩廣副總兵董興武毅、觀望不肯戰、  
巡撫侍郎揭稽、李棠不相統、賊益熾、于少保請用安遠侯  
柳溥、總督兩廣軍務、如溥未可出、臣謙及戶部尚書金濂、  
劾乞用一人、上用公、明年蠻平、召還臺、是年夏、吏部何  
尚書下獄致仕、公以太子太保兼吏部尚書、初公入四川、  
專布恩信、招懷降附、出賜金市牛酒、慰犒番酋商巴等十  
八寨、來歸不煩兵力、松番遂定、遼東法令久弛、不復知有

朝廷賞罰以故虜至不敢戰戰亦不力公至諸將庭叅責其翫寇喪師失律當斬軍中股慄頭搶地言自今效死用命得釋公卽出巡邊起山海抵開原繕濬埔溝五里爲堡十里爲屯烽燧斥堠千里相望虜見嚙指走公益簡練卒伍賑賙窮乏偶配鰥寡人情大悅邊塞孤遠軍輿輒置緣俗立法細大收贖十數年間得金穀馬牛羊數十萬邊用充饒器械明和士皆飽煖願得一戰報王公逾年督諸軍出塞大破虜斬首千級比至嶺南亦用收贖法時公威望已著諸蠻聞公來大懼公略兵威推誠撫諭盜賊止息酋長信向公嘗言蠻戎撫捕各有機宜以故四川兩廣得免

繹騷之患。公初入吏部。佐王文端公。天順初。落太子太保。文端公致仕。專任公。公嚴考察。公銓註抑奔競。杜請寄。一時任使。並稱得人。南陽爲石亨逐去。裕陵召見公。問賢。

何如人。公力言賢才。得復留內閣。益見倚任。南陽在內閣。亦左右公。上進退大臣。時時召公面。可否稱公。先生屢乞休不允。公以故得行其志。天順五年。加太子少保。上

嘗諭南陽曰。今六部尚書庶皆得人。但慮吏部王翱老爾。

每如此

時公年七十八。南陽對曰。臣聞祿命之說。翱壽最高。尚有

十年。上喜曰。如此無慮。又曰。如戶部年富不易得。南陽

對曰。若繼翱吏部。非富不可。上曰。然。茂陵卽位。免公。

雨雪朝成化元年復太子太保三年致仕卒年八十四贈太保諡忠肅公善知人文武大吏施聚焦禮范信耿九疇軒輊年富李秉程信皆公薦用公本北人嘗因召對裕陵曰此人質直雄偉文章藻飾似不及南人顧緩急得力以故公推轂北人爲多至姚夔又及公往往右南人清譽稍不及公功名損於禮部時公端方強毅清白儉約立心制行循守禮法惕厲憂勤仰思待旦居第三十餘年不改於舊上特命有司起第縣西公餘退宿朝房唯朔望時令歸謁先時曹賊亦知重公不忍加害南陽嘗曰臬陶言九德王公有其五亂而敬擾而毅簡而廉剛而塞強而義

彭惠安公贊公淡然無欲不識姜姬而况苞苴莫我敢施古三不惑於公見之人皆以爲確論子竝世官錦衣副千戶

太子太保陳僖敏公

事

長陵

歲陵

景陵

裕陵

公名鑑字有成吳人永樂十年進士爲御史陞按察副使擢副都御史鎮陝西得便宜行事公寬洪清慎悉民疾苦不作聲色專務安輯凡練兵屯田水利鹽法事有經畫薦按察使王文副使金濂入內臺正統元年與于公上疏請定輸粟贖罪法在陝十餘年教興政理每入朝民必遮道送不忍舍比還歡迎父老或走數程久旱公至卽雨雨久

公至必霽人益愛戴公召入臺爲右都御史尋陞左都御史太子太保景太四年秋致仕卒謚僖敏陝人尸祝焉

尚書郭公

事

長陵

獻陵

景陵

祿陵

公名璉北圻新安人初名進太學生永樂中爲戶部郎官公質直寬厚臨事從容不見喜怒精練吏事簡約有條宜德初爲行在吏部左侍郎兼少詹事上爲改名璉四年

代蹇忠定公爲行在吏部尚書罷兼職五年冬上諭曰朕以用人之柄付卿卿宜爲朕擇才昨郡守多缺命廷臣薦舉古人當斯任者必勤於咨訪有得卽錄故官不乏才呂蒙正夾袋虞允文材館錄是也慎留意正統元年進士



李賢入選公試賢嘉禾詩奇賢輔相材授驗封主事未幾  
早蝗侍臣言大臣尸位妨賢內批令自陳諸大臣遂皆乞  
去謝天譴公獨不可曰主上冲年吾輩皆先朝簡任受  
付託一時請去誰與共理宜引罪乞改過璉老矣官至冢  
宰豈敢貪位顧君臣恩義如此衆是公言疏上盡留諸大  
臣公秉銓十四年名不及蹇公然潔廉務採實行不用浮  
薄游聲譽之士雖爲內閣所侵能堅忍持正自行其志正  
統七年請老

尚書周文襄公

事

長陵

獻陵

景陵

公名忱字恂如吉水人永樂二年進士時簡進士二十八

人進學文淵閣。公乞預。上喜公有志，改翰林庶吉士。十

年授刑部主事。陞員外郎。二十二年爲越府右長史。宣德

五年東南財賦煩敝，廷薦陞工部右侍郎，巡撫江南直隸。

滿九年轉左。正統六年兼巡撫嘉湖二府。十四年八月陞

戶部尚書，改工部。仍巡撫。景泰元年引老不允。明年請老，

召還京致仕。又明年卒。凡在江南二十二年。先是胡桀巡

撫江南，用法嚴刻，公憐之以寬。凡告訐輒不省，或面詰公

不及胡卿使下情，不能上達。公笑應曰：「胡卿勅有祛除民

害語，我勅但云撫安軍民，朝廷委任自異耳。」當是時，蘄州

府逋稅七百九十萬石，常松亦然。公閱牒大異，詢父老皆

伏地哭言、蘓吳豪富有力者、不出耗、并賦之貧民、貧民不能支、盡流徙、公創爲平米官田、民田并加耗、蘇稅額二百九十餘萬石、公與知府况鍾曲算、疏減八十餘萬、舊例不得團局收糧、公令縣立便民倉、水次每鄉圖里、推富有力一人、名糧長、收鄉圖里人夏秋兩稅、加耗不得過十一、又於糧長中、差力產厚薄爲押運、視遠近勞逸爲上下酌量、支撥京通正米一石、支三臨清淮安南京等倉、以次定支、爲舟檣剝轉諸費、填出銷入、支撥羨餘、各存積縣倉、號餘米、米有餘、減耗、次年十六徵、又次年十五、更有羨縣爲倉名預備、備水旱不時賑貸、及農乏食、綱運風漂盜奪者、國

服轉假至秋。抵斗還官。其修圩築岸。開河濟湖。人支口糧。以爲農事。故不責償。時插蒔農借貸。必驗中下事力。及田多寡。給之秋與糧。并賦。凶歲再賑。秋熟不償者。來歲不復給。時裏河漕軍與民半軍。船出官廠。民率顧舟。又經年往復。失農業。公與平江伯議。奏軍民舟至淮安。或瓜州水次交兌。江北衛所漕者。出通關。還繳淮安一石。兌加五斗。瓜洲五升。如裏河舟未渡江。南京諸衛抵倉兌者。加與過江米及搬墊蘆席與折米。民間馬草歲運兩京。勞費不貲。公請通州草場立官庫。每束折銀三分。千束銀止三十兩。南京輕齎赴買。上北京文武職官俸糧。皆支南京米。賤時銀

一兩得米七八石公請江南重額官田極貧下戶兩稅准折納金花銀銀一兩准米四石解京折京官俸蘇有官布足准糧一石舊例足重三觔比解又以紗麤十退八九公言農間布足觔重紗麤價顧賤紗細布輕價益高不拘觔重務在長濶如式耳傳中馬永被諸應客者舊皆領於馬頭馬頭豪者橫科弱者粥產公令田畝收米升九合與糧俱征驗馬上中下價直給米正統初淮揚災鹽課虧公巡視奏令蘄州等府撥剩餘米縣撥一二萬石運貯揚州鹽場准爲縣明年田租聽竈戶上私鹽給米時米貴鹽賤官得積鹽民得食米公私大濟綵繪宮殿計用牛膠萬餘

勅遣官勅公 上供甚急會公議事赴京遇諸塗勅使速  
公且還治公不應至京庫貯牛皮歲久朽腐請出煎膠歸  
出餘米市皮還庫十四年邊事急工部索兵仗數百萬計  
公出餘米造上明盔者須水磨非遲歲月不可公令且沃  
錫旬日畢辦正統六年至海鹽築捍海塘令郡七縣合役  
萬夫自七年正月至十一年費萬計皆出公度支海竟不  
能爲患每遇凶荒輒便宜從事補以餘米賦外更無科率  
凡百上供及廨舍學校賢祠古墓橋梁道路溝渠修葺  
一切取餘米歲不下萬計施及僧道問報饋遺往往各得  
其歡心江南之人愛戴如父母沒而尸祝至今思周尚書

也。公字量恢，弘才識，通敏蒞事，精勤臨民，和易有善謀者。雖卑官賤吏，破去崖岸，開心訪納，性尤機警，籌畫諸郡錢穀，鉅萬一屈指無遺算，嘗爲冊曆，記日所行事，及陰晴風雨，有告報輒按據詰訊，人莫能欺。每出會計，視地豐凶，事緩急，爲弛張調劑，變通民無逋負，官有餘積。前後理財者，皆不能及。卒，年七十二。諡文襄。

鄭端簡論曰：忠定秉餘忠靖，握利權，皆二十七年。忠宣尚書兩京三十九年，而在交南者十有九年。忠安爲禮部尚書三十二年，文襄巡撫江南二十二年，皆久任責成，以故用人理財，禮樂征伐，諸大政事，文經武緯，各盡其長。章程

故在後鮮能及焉。

太子少保右都御史羅公

景陵 長陵 獻陵 裕陵 景帝

公名通字學古吉水人年二十四舉永樂壬辰進士授監察御史通與諸御史上疏忤旨未發亡何交趾平地絕遠多瘴癘而夷僚新附畏約束中朝士憚往。上詔御史予三級知交趾諸州通得清化已而黎利叛來攻清化通累擊却之而成山侯王通擅與利媾棄交趾拔吏士歸檄至通怒髮上指謂都指揮等曰王通不奉。上命喪地辱國此城羅生歿所耳都指揮曰如教於是獨不與黎利清化利大發兵八萬晝夜來攻圍通歿戰大敗之踰年而



詔使至如成山侯誥乃全吏士歸帝怒收成山侯下獄論  
死贖爲庶人餘非罷卽謫而獨引見通改戶部員外郎久  
之坐法免徙南邊赦歸睿皇帝北陷虜虜日近詔羣  
臣舉將略有以通應者拜職方郎中尋擢右副都御史守  
居庸歲十月也先脫脫不花王阿剌知院三萬騎逼居庸  
甚急通飭將士冒矢石固守不下而宣府叅將楊俊者以  
精騎入衛京師道關夜遣裨將告通通仗劒厲聲曰若欲  
保京師耶保京師保居庸足矣下令有一人一馬南度者  
斬以徇乃止會天大寒令老弱汲水灌城水堅滑不可破  
七日虜退趨紫荆通選兵追敗之逐出長安嶺中外始定

捷聞、加太子少保、右都御史、賜璽書慰獎焉、通數上書論兵事、與于謙不合、乞病歸、卒、或曰、通在清化、得異人授以遯甲諸書、習之精、重謫南荒、復延秘跡、虜寇居庸、望烟雲草木、若數萬人狀者、弘治末年、隆興父老、奏已巳之變、通守關有保障功、勅祠居庸關、

尚書年恭定公

事

長陵

獻陵

景陵

裕陵

景帝

公名富、字大有、懷遠人、本姓嚴、籍訛爲年、永樂中鄉貢爲山東德平訓導、召爲吏科給事中、陞陝西叅政、巡歷郡邑、察民隱、革奸弊、興學勸農、尤嫉賊吏、正統九年、陞河南布政使、飢民流聚十數萬、剽掠居民、撫輯散解、力行節儉、

却侈靡風俗爲之一變也先數侵邊陲左副都御史提督大同軍務舉廢政革科徵抑豪橫廣屯田民始有更生之望軍功爵賞必覈無濫襄垣王遜燁誣公公請老戶部言公廉威爲奸豪所忌不可許景帝爲勅王守法度勿得汗風憲大臣卒吳淮誣公不法謂侵郭總兵坐總兵上于謙議曰穰苴布衣監莊賈軍以軍法誅賈卒破秦晉齊以一穰苴故稱強列國裴度御史中丞督淮西諸大帥平蔡我朝近日左都御史王黼右僉都御史鄒來學皆坐總兵上以軍令出黼等淮妄言沮軍法宜究主者事遂寢公又嘗按山西叅政林厚生厚法厚亦誣公臺置獄訊景帝

曰厚怨富富執法公廉誣富得自便朕以邊事付富終不以一人言辱富厚竟削籍公又按分守內臣韋力轉貪虐力轉誣公巡按御史爲雪公誣狀事得已天順初石彪倚亨中公危法逮詔獄上素知公南陽又力爲解得致仕未幾南陽薦賈銓爲戶部尚書召銓至又薦公左右不悅公者輒巧譖沮公上諭南陽戶部非年富不可對曰人多不喜富上曰富執法宜司國計竟召公爲戶部尚書時王忠肅公年七十八上又諭南陽曰繼餉吏部非富不可公經理財賦蒞以勤廉不動聲色出納節適八年春陝西用兵督餉非人屢乏軍興公薦楊瑄余子俊吏部疏

論公侵官公上言薦賢爲國同心共濟若事輒任已動率  
尤人恐乖推讓之風自失寅恭之義且乞致仕不許公剛  
正朴忠簡言寡慾遇事直前不顧利害氣節才識世不易  
得卒年七十諡恭定

尚書耿清惠公

事

長陵  
裕陵

獻陵

景陵

公名九疇字禹範盧氏人永樂二十二年進士宣德六年  
爲禮科給事中正統二年兩淮鹽法大敗擢運司同知公  
性節儉嚴肅尤慎交接吏胥豪商勢家凜凜不敢肆嘗條  
奏鹽法便宜事著爲令丁內艱鹽場數千人走闕下乞留  
陞都轉運使嘗坐水旁童子曰水清不若使君清已而被

誣逮下獄得釋。又以都御史清理兩淮鹽法。景帝初陞  
刑部右侍郎。屢辯疑獄。有婦訟其夫坐離異。公不可。杖其  
婦歸夫。尋出理兩淮鹽法。已兼江北巡撫。歲凶盜起。公善  
循拊流民復業者七萬家。勅錄諸郡大辟囚。寃得釋者  
二十六人。有婦人來何苟家者。去而歿。婦家訟苟與弟殺  
婦。苟誣服。公疑之。釋苟兄弟。已而竟得殺婦者。讐家也。代  
還京。景泰三年。王文當出陝西鎮守。代陳鑑。文不欲行。諷  
諸御史留已。公以侍郎出陝西鎮守。除弊屏貪。威望益著。  
先是巡撫多部寺司堂上官。文移不得輒下。按察司下亦  
不肯受約束。公奏得徑下。邊將請增臨洮諸衛戍兵。下公

議公言邊城士卒不爲少將官能嚴紀律精練習勤撫恤絕浸漁養銳氣加以賞罰明信人人自奮不然徒冗食耳。是。是。竟不增戍是秋勅公考察陝西方面官四年冬陝西左

布政使許資言侍郎鎮守與御史不相攝文移輒礙改公右副都御史鎮守會又言市羊角爲上供燈公疏論曰

昔宋神宗買浙燈蘓軾諫止今買羊角製燈無乃類是

上遂止天順元年公來自陝西留爲右都御史勅公考

察諸御史是年諸御史劾曹石逮詔獄并逮公降江西右

布政使尋轉四川上知公清正一日對輔臣論人才言

九疇去非其罪南陽對曰九疇操行誠不易得未幾以禮

部召至京、陛見、上憐其老、改南京刑部尚書、曰、遂卿優  
閑、四年卒、上又曰、可惜此老、以左都御史蕭維禎代公、  
公孝友純至、居喪秉禮、平生無他嗜好、雖權貴亦敬憚不  
敢犯、好善嫉邪、別白太過、以故與衆不合、累遭讒困、卒謚  
清惠子裕自有傳、

僉都御史楊恭惠公

事

景陵

裕陵

公名信民、新昌人、永樂中舉人、宣德間、擢工科給事中、正  
統間、陞廣東左叅議、嘗劾罷按察使、被逮至京、廣中數千  
人、走、萬里、詣闕、疏、公、公勤廉能、乞留以安百姓、得復職、適  
南海盜起、陞僉都御史、守其地、公宣布恩威、獎勵士卒、屢



戰屢捷、撫歸數萬人、景泰元年卒、官廣人、手香燭、弔哭者、幾萬人、錄其子玠爲太學生、廣耆民、又相率走京、乞立祠祀公、著祀典、成化中、謚恭惠。

太傅于忠肅公

事

景陵

裕陵

景帝

公名謙、字廷益、其先河南人、七世祖某仕于金、爲汾州節度使、子孫世世爲大官、至高祖、薨、仕元、爲河南江北行中書省叅知政事、追封河南郡公、曾大父九思、仕至湖廣宣慰使、都元帥、最後遷杭州路總管、卒老于杭、遂爲杭人、大父文始仕明、爲兵部主事、改工部、父彥昭、有隱君子行、受謙封兵部右侍郎、再與其曾大父、六父、俱贈少保、兵部尚

書謙七歲僧蘭古春善相見而大奇之曰所相人毋若此  
兒者異日救時宰相也十六補邑諸生時按察僉事行學  
督諸生過峻爭噪而特之方詎攘間僉事墮泮官池諸生  
皆驚走出謙獨前掖之起僉事瞽乃欲以罪歸謙謙徐對  
曰噪公者走不噪公者留此易曉也今不罪噪公者猶可  
而因以罪援公者其謂何僉事乃止而謙由此顯名二十  
三舉進士拜江西道監察御史謙風骨秀峻音吐鴻臚每  
奏對宣廟前上必爲傾聽而是時顧端肅公佐長臺  
事其御察屬甚嚴而獨才謙以爲已弗如也按江西辨一  
誣獄出數百人之冤灰者藩國挾和買爲市屢害謙復按

懲之歸復偕錦衣官校揆捕官河之匿私離者所按覈於  
權倖不小避危蹕下樂安州漢王高煦旣面縛降上卒  
令謙數其罪謙肆口而成其言皆正大剴切高煦俯首戰  
慄稱萬死而已上大悅還師第賞鈔幣與大臣同久之  
議增補各部右侍郎治諸鎮糧稅兼練卒撫民上手書  
謙姓名授吏部遂超拜兵部右侍郎兼治河南山西時年  
僅三十三謙感上知遇夙夜相循郡邑延訪父老以便  
益病苦歲饒則多出官錮糴民粟歸庾儉則吐庾粟減直  
以糶公私得相贍而於下尤利齊秦民饑徙入河南者謙  
令邑各給田與之牛種而以次責其稅毋令與土著淆河

勢將潰謙厚築堤障之多植榆柳其上五里有亭亭有長  
暨卒責以修補乃至所過經由官道俱責種樹間鑿井以  
蔭行者而飲渴者其在山西則以大同在塞外巡按御史  
不能至往往翫狎請別設御史併上谷治之而又盡奪大  
同鎮將之役卒墾私田者爲官屯邊用充溢謙于吏術民  
事士所不精訓而充以足兵食明舉措振綱紀爲急當是  
時居政本者三楊皆重謙所奏請朝上毋不夕報可以足  
得行其志滿九歲遷左侍郎食二品俸謙旣在官又威惠  
流聞嘗輕騎自河內歷太行而盜有窺者謙勵聲叱之皆  
大驚散走曰不知爲我公也當入朝議事人謂卽不橐

金往寧無一二土物充交際耶。謙笑而兩舉其袖曰。吾惟  
有清風而已。因賦詩見志。入朝舉叅政孫原貞王來自代。  
是時三楊前後卒。而中貴人王振恃秉勢張甚。以謙無私。  
謁。謙之。勒給事中廷劾謙。以久不遷。怨望。擅舉人自代。亡  
人臣禮。下法司論斬繫三月。暑獄上。振怒適解。乃謂大臣  
吾嘗見一故御史名若干謙者。恣甚。欲治之。今乃非此于  
謙耶。赦之。以爲大理寺左少卿。而所薦孫原貞王來俱顯  
名。景泰中。至尚書。與謙略相埒。謙甫出獄。而山西河南吏  
民伏闕上書。請借留謙者。以千數。周晉諸王亦言之。乃俾  
以少卿復撫二鎮。又明年始以兵部右侍郎召。距其初至。

鎮十九年矣。是時南北屢用兵，大盜時起。尚書鄭埜以清幹著，而謙佐之以弘斷，部事雖稍稍飭，然尚扼於中貴人，振不能大展，而亡何爲正統己巳，虜酋也先旣破略獨石馬營諸鎮，至秋益猖獗，振遂坎上下詔親征，謙與鄭埜上言也。先醜豎子耳，諸邊將士足制之。陛下爲宗廟社稷主，奈何不自重，奉以與犬羊角乎？上不聽。埜乃從治兵，而留謙治部事。車駕至土木，蒙塵，報至京師，大震。皇太子幼，不能監國。太后乃命郕王攝政以輔之。王御左順門，時中貴人振雖以歿虜，中外恨而欲食其肉。於是九卿臺諫廷劾振罪，請用反法於其家，奏未竟而錦

衣指揮馬順者振黨也妄傳王旨叱衆退給事中王竑

起直前擒順曰此正所謂翼虎者今日猶敢爾衆爭捶之

立死又捶二閣之嘗私振者死時衛卒聲洶洶王懼欲

退諸大臣皆披靡有趨匿者公獨直前掖王且啓王

下令曰播順與二閣死○者○義○激○無○罪○少○選○俟○得○請○皇○太

后○卽○族○振○且○籍○順○等○家○衆○姑○退○于○是○王○乃○起○謙○徐○徐○步○

出○掖○門○吏○部○尚○書○王○直○者○最○爲○篤○老○臣○執○謙○手○而○歎○曰○朝

廷○正○藉○公○耳○今○日○雖○百○王○直○何○能○爲○尋○進○兵○部○尚○書○謙○謝

弗○允○乃○上○言○扈○駕○文○武○臣○有○預○軍○事○進○止○當○以○失○機○論○旣

死○亦○不○宜○濫○卹○報○許○鄭○王○旣○卽○大○位○益○賢○謙○虛○已○委○焉

入對慷慨泣奏曰虜得志挾我大駕勢必長驅而南今

軍實武庫兵盡矣司馬宜急分道募兵及留漕卒自益司  
空宜併日而蒐乘繕械九門要地宜令都督孫鏗衛穎雷  
通張軌等分守之都御史楊善給事中王竑等叅馬凡兵  
皆出營郭外毋令避而示弱郭外之民皆徙入內安插毋  
令失所而驚通州倉欲守之或不能委以與虜則可惜宜  
令官軍皆給一歲祿俸聽其自選仍以贏米爲之直虜所  
急者草諸廠宜亦聽軍裨力取之不盡則焚之毋以飽虜  
馬而是時石亨方坐繫楊洪亦以逗遛當譴謙惜其材勇  
請赦之與安遠侯柳溥爲大帥而身總其機宜進止不效



則治臣之罪以謝天下。上皆嘉納之。虜報益急。而侍講徐理者以曉暢軍事聞。且好言天象。上使中貴人召而詢之。則力謂紫微中宮皆有變。必反故都而後吉。諸中貴人之鼠竄者。戀土者。相軋未定。而搢紳士人多遣其私重歸謙。乃慟哭廷評曰。京師天下本宗廟社稷山陵寧此百官萬姓帑藏庾廩萃此。此而不守。去欲安之。今日足一動。明日大事去矣。且虜乘勝驕。實不足畏也。上聞之曰。善。其一聽謙處分十月也。先挾太上皇帝破紫荆。直窺京師。石亨議毋出兵。第堅壁以老之。謙曰。不可。賊張甚矣。而我又先之弱。是佐彼張也。亟操甲統大營營於德勝門外。

諸門皆有兵總二十二萬虜見我兵盛而嚴不敢輕犯以數騎來嘗我謙乃設伏於空屋使數騎誘虜虜遂以萬騎來薄我伏發敗之孫鏜毛福壽復敗之西直門謙使謀謀上皇舉駕遠夜令人以火炮擊其營死者千計賊遂退有詔褒予謙進少保總督軍務謙固辭不許謙退而語人曰四郊多壘卿大夫耻之今謙不能死而以微功賞能無愧哉復上疏固辭不許大同參將許貴奏請遣使賜其幣以款虜而徐爲討伐計謙謂前者非不遣使都指揮李鐸指揮岳謙遣而虜隨入寇通政王復少卿王榮遣而不獲徵太上一信其役焉極我何似而可言和况虜不共戴天譬

也。理固不可和。萬一和而虜遂肆無厭之求。從之則坐敝。不從則生變。勢亦不可和。因劾介冑之臣。委靡退怯。法當誅。於是邊將人人言戰守。虜不能挾重相恫喝。始欲歸太上矣。謙以涿易真保諸州郡。爲京師拱衛。而事力單甚。乃皆宿兵。使都指揮陳旺等分將之。而右都督楊俊帥焉。久之。皆屹然重鎮。俄謀報虜。逼總兵朱謙於關子口。明日復報。迫石亭於鴈門關。烽火連屬。衆皆恐。請大發兵援之。謙策大虜尚遠塞。必張疑兵以脇我。乃上方略授亭等。使皆堅壁。而今各營秣馬厲士。使若將大舉者。已而賊果不至。中貴人喜寧者。故俘虜也。下蠶室得近。而後復沒虜。爲

虜用諸所要挾皆寧謀謙密授計楊俊捕而磔之復授計  
侍郎王偉誘誅爲虜間者小田兒虜自是益計屈時復議  
遣使與也先和且迎太 upper 羣臣王直等請之力上意  
不懌曰我非貪此位而卿等強樹焉而今復作紛紜何衆  
不知所對謙從容曰天位已定寧復有他言和者覲以解  
目前而得爲備耳上顧而改容曰從汝從汝於是左都  
御史楊善以泛使往而上皇得返駕矣先朝處降虜近  
畿也先入寇多從之而北會西南方用兵謙與上謀每  
征行輒挾其精騎以往厚與之資有功則官之已而更遣  
其妻子自是肘腋少他患楊洪旣自獨石入衛而所留老

弱凡八城悉歸也。先然彼亦不之守。謙謂此宣府垣屏也。不可棄。乃復授都督孫安計。使以精兵由龍門關出據之。而募民屯田且守。八城遂復。貴州苗寇久未平。侍郎何文淵請罷二司。專設都司。而以大將鎮之。謙曰。不設二司。是夷之也。夷之何以通滇粵道。且無故而棄。祖宗所設地不祥。遂寢。當是時。浙闕則有鄧茂七。葉宗留。廣則有黃蕭養。又有獍獠。而三楚之貴竹苗獠。處處蜂起。前後命將將兵皆出。謙旨號令明審。動合機宜。雖宿舊勲臣。小不中程。卽請旨切責。究治不貸。片紙行萬里外。電耀霆擊。靡不惴惴効力。毋敢飾虛辭以抵者。以故天下咸服謙而歸。

景帝能用人。

太上既歸。

上奉之南城。又欲易。

皇太

子。謙以非所職。不敢爭。而

皇太子立。內閣九卿俱加師

傅等官。謙得太子太傅。且命兼支二俸。羣公皆一辭。謙獨

再辭。其文婉約。以示風。上弗許。時已城下之役。石亭

功不加謙。而得世侯爵。心愧之。乃推謙功。詔予一子。府

軍前衛副千戶。謙辭至再三。有云。縱臣欲爲子求官。自當

乞恩於君父。何必假手於石亭。於是亨益愧。且恨謙矣。

上復賜謙關西甲第。謙辭曰。匈奴未滅。何以家爲。去病豈

子。尚知此意。臣敢饗此。又不許。乃置上前後所賜。

袍。鎧。冠。帶。弓。劍。之屬於堂。而加封識。歲時一謹視而已。謙

多寓直房以便朝謁。一日病痰壅，上使中貴人興安太醫院董宿視之，云：「治痰必需竹瀝。」上為親幸萬壽山伐竹以賜，且命計謙日用需，悉出自尚方。謙皇恐謝，且乞

歸。詔免朝謁，尋賜璽書褒予備至。太宗以北伐故

宿兵燕中甚盛，而會承平久，不能無老弱。公候中貴人往往役占土木之難，半以委虜。其額雖有五軍神機三千諸營，將不相屬，相支調為恒。謙議選精兵十五萬，分十營，營以一都督領之，五千人為一小營，營以一都指揮領之。餘兵散歸五軍等營，以備次調。雖有楊洪、石亨、柳溥等大帥而進止賞罰一由謙，相顧頽首而已。洪、亨皆老將，宿將而

亨尤貪縱自快、謙事裁之、洪、久而子俊恃勇、驚桀不可馴、  
曾疏請悉發京營與諸鎮兵、大舉逐虜而犁其王庭、可以  
得志、謙持不可、曰、大舉未必能值虜、值虜未必勝、而彼率  
其別部異道而擣我虛、寧萬全策也、俊語塞、後竟以不法  
爲謙紕論削、亨有從子彪、以驍勇著、亨恃而強、謙出之爲  
大同游擊將軍、以是益恨謙切骨、而中貴人曹吉祥、劉永  
誠者與謙共兵事、亦啣謙氣陵之、景皇帝不豫、石亨謀  
與吉祥等發南城錮、迎太上復辟、甫御殿而執謙、與大  
學士王文下獄、謂謙文與中貴人舒良王誠、張永等謀迎  
襄王爲帝、坐以謀反律、凌遲處死、然實無顯跡可據、而廷



鞠日、亨等加鉅鑽鍛煉、文不勝憤、辨之苦、謙笑曰、亨等意  
欲、成、我、何、益、既、奏、上、上、猶、豫、曰、于、謙、實、有、功、若、何、時、徐  
理、者、改、名、有、貞、而、與、亨、比、前、曰、不、僂、謙、此、舉、爲、無、名、謙、遂  
論、棄、市、籍、其、家、自、上、賜、外、無、長、物、謙、歿、之、日、陰、霾、翳、天、  
行、路、嗟、歎、吉、祥、麾、下、有、達、官、指、揮、衆、耳、者、以、一、觴、酌、其、地、  
而、慟、吉、祥、恚、仆、之、明、日、復、酌、慟、如、故、先、是、杭、之、西、湖、涸、龜、  
底、孫、原、貞、時、填、其、地、語、人、曰、哲、人、其、萎、乎、吾、甚、虞、于、公、謙、  
歿、而、陳、汝、言、者、亦、亨、黨、也、代、爲、尚、書、不、一、載、而、敗、籍、其、貲、  
列、內、廡、上、召、大、臣、入、視、已、愀、然、曰、于、謙、終、始、景、泰、朝、  
被、遇、若、一、身、歿、無、餘、貲、汝、言、抑、何、多、耶、俄、西、北、邊、報、甚、亟、

上憂之時恭順侯吳瑾侍進曰于謙在不令虜至此上  
爲默然是歲有貞以內閣首輔與亨吉祥爭權下獄流金  
齒又三年亨下獄庾夬家籍彪棄市又二年吉祥與其從  
子昭武伯欽反族謙有一子冕自府軍前衛千戶赦歸  
憲宗初上疏白冤狀上憐而復其官賜祭有云當國家  
之多難保社稷以無虞惟公道而自持爲權姦之所害在  
先帝已知其枉而朕心實憐其忠天下誦而稱之孝宗  
初加贈特進光祿大夫柱國太傅謚肅愍賜特祠於其墓  
曰旌功冤改文資累遷至應天尹有幹用聲謙爲文肆筆  
立就詩亦爽儻然少裁割獨其於奏疏尤明切嘗口授兩

吏傳寫指腕爲痛、所存奏牘若干卷、集若干卷、萬曆中、改諡忠肅、

弇州外史曰、李夢陽爲于謙祠記曰、謙、成、一、時、痛、之、云、驚、  
驚、冰、上、走、何、處、尋、魚、鱗、而、當、虜、之、墟、太、上、而、南、至、宣、府、  
宣、府、人、登、陴、曰、賴、天、地、社、稷、之、靈、國、有、君、矣、至、大、同、而、大、  
同、人、登、陴、曰、賴、天、地、社、稷、之、靈、國、有、君、矣、而、謙、獨、颺、言、曰、  
社、稷、爲、重、君、爲、輕、斯、言、也、功、以、之、成、禍、以、之、生、然、歟、否、耶、  
謙、以、介、胃、分、不、言、和、而、言、戰、守、當、太、上、之、迎、復、謙、不、爲、  
梗、小、梗、者、王、文、楊、俊、耳、景、帝、之、信、謙、謂、其、能、禦、圉、非、有、  
布、衣、腹、心、素、一、不、合、則、睽、再、不、違、則、去、夫、人、主、以、私、愛、欲、

易太子雖留侯不能得之漢高而謙能得之景帝乎哉  
天命所皈大寶中奪小人貪功伏機姦發元勲甫就膺此  
禍烈智不及避勇不及決悲哉

太師王端毅公

事

裕陵

茂陵

公名恕字宗貫陝之三原人正統十三年年三十餘成進  
士改翰林院庶吉士翰林院業治古文辭而恕不喜爲古  
文辭務以明體適用本之經術博極經濟以是不得留出  
爲大理寺左評事遷左寺副條上刑罰之不中者六事於  
朝而議行之五年擢知揚州府天順四年以考最超拜江  
西右布政使嶺寇有犯贛州者恕奉檄帥師討平轉河南

爲左、成化元年、進都察院右副都、撫治南陽、襄荊諸府、時以襄南多山、秦楚之流民萃焉、礦賊又不時發、特開府撫治、而恕首得之、已會兵搗襄盜、平其巢、又平湖廣劉千斤石和尚之亂、因榜諭流民、各使復業、流民聚貲立生祠祀恕、家家繪恕像、母憂歸、四年、卽家起復、巡撫河南、明年、入朝議事、因上六事、轉南京刑部左侍郎、父憂歸、七年服除、以刑部左侍郎治漕河、九年、改南京戶部、十二年、改左副都御史、巡撫雲南、時朝議以雲南在萬里外、西控諸夷、南接交人、鎮守中貴橫甚、欲借恕彈壓、恕心知所謂、單車携二童往、中貴人錢能使其麾下指揮郭景等、以玉帶龍衣

長流記

驛謁安南王黎灝王報以異寶生金通犀象

牙等物、景等復與其國互市、稠載還、恕廉得之、遣騎道執景、景迫投井、死、因悉銀鎰其從者、下之獄、而沒入其賄飛章、露幼能私通外夷罪、當死、當是時、瀕別爲私、郤以通漢省、欲乘間取我、至是其謀始杜、而錢能復使使乘驛以黃鸚鵡進、恕復上章極言萬里勞人、進一羽族微物、恐天下有以窺見上意、因盡發能貪黷暴肆諸狀、言昔交趾以鎮守非人、致一方陷沒、騰衝啓釁、致麓川叛逆、今日之事、殆又甚焉、上爲不得已、召能歸、安置南京、而黔公諸大

師以及土酋皆惴惴奉三尺矣。忽在雲南九閱月，疏二十

上十三年三品滿九載進右都御史明年召掌南京都察院事往返衣書一索而已掌院未幾參贊南京守備又遷南京兵部尚書參贊如故蓋攝營將之占役者一卒不得走私門參使過龍江驛嚴禁織作工賈非奉旨毋得自爲互市考選軍政卽同事者無敢干頗不便怨而適有輿力取中旨又明年改兵部尚書兼左副都御史巡撫南畿兼督糧餉恕以天下一切納貢賦者苦收取過重至破家乞嚴禁革光祿寺歲供白粳槩及庖人賤工請稍裁省皆報可常州時有羨米請以六萬石補常州之夏稅又以補諸府戶口鹽鈔六百萬貫官田賦太重減耗米十餘萬明

年水災奏免秋糧數十萬草半之而周行賑貸其貧者至二百餘萬口三吳之人以爲自設巡撫來幾一甲子獨怨與周忱兩人而已忱以十八年恕不二年其久與暫不相當然忱彷彿姚元之恕則賢於宋璟矣中貴人杜福以中旨下常州取截江網及刻絲觀音羅漢古跡恕言帝王之學貴要典謨訓誥及無逸旅獒上不之取而取截江網者何也中貴人王敬挾其千戶王臣以妖術取中旨齎御帑金收市圖籍珍玩因而張皇聲勢搜括富人財寶人情洵洵恕乃盡列其罪狀三劾奏之王敬亦誣奏恕因而株及常州守孫仁方未決而東廠中貴人尚銘亦發其



狀上始下敬錦衣獄謫戍并戍其黨十八人而梟王臣首於江南遠近稱快以是益歸心恕二十年復爲南京兵部尚書叅贊機務時錢能復寅緣得同守備南京與恕共事然亦心服恕語人曰王公天人也吾唯有敬事而已滿九載加太子少保會刑部員外郎林俊疏論中貴人梁方與妖僧繼曉比而造大鎮國永昌寺忤旨下詔獄都督經歷張黼救之亦下獄謫外恕言京師祀天地僅一壇祖宗暨先聖僅一廟而佛乃至千餘寺者外也一寺立而移民居者且百家費內帑者且數十萬俊言當不宜罪宜特復其官併復黼官上雖報聞而中不能無嫌以星變還

俊黼南京恕凡應詔者二十一建白者二十九多報可天下益服恕之直至朝事有所不可必曰王公胡不言則又曰公疏且至矣而恕疏果至至爲謠曰兩京十二部獨有一王恕公卿大臣皆側目而天子亦漸心厭之最後所言政令失信尤中上諱會南京兵部右侍郎馬顯以病告忽附批落恕太子少保以尚書致仕恕既歸名益高臺諫推薦累上上崩孝廟卽位於是薦恕者無虛日卽家特召馳驛以來中途引疾不許改吏部尚書入見卽加太子太保言官猶謂恕且老不當勞以繁劇宜用之內閣以備顧問上報曰朕用蹇義王直故事官恕吏部謀議無

不聽從何必內閣也。恕薦彭韶、張悅、周經爲左右侍郎。耿裕、何喬新、倪岳皆引置執政。忠諫如王徽、黃仲昭、賀欽、被抑如周瑛、祁順並皆薦用。總督兩廣都御史秦紘、紘總兵安遠侯柳景不法反爲景所誣與俱罷。恕言紘不當罷卒奏起爲戶部尚書。有徐生者太醫諸醫也傳陞院判。恕執奏下吏部會禮部太醫院同御藥房太監選用。恕力爭祖宗來未有吏部會內官推選官員例。上曰徐生善藥與院判恕遂乞休。屢疏上。上曰卿持正輔佐朕心知之勿辭。恕遇事輒言有不合卽引疾求退。上每溫言留恕內閣。滋不悅謂爲好名。滿三載授恕光祿大夫柱國。上念

恕老。大風雨雪免朝。又免午朝。以疾告。輒遣中貴人存問。御醫視脉。牲酒米蔬相繼。而歲時珍鮮金綺之賜。與內閣輔臣埒。御醫王玉自陳春宮效勞。乞陞職。下吏部。恕請逮問。有旨免問。而增俸二秩。恕固執不可。乃已。時丘濬掌詹事府。亦加太子太保。而以禮部尚書故。班恕下。旣入直文淵閣。兼大學士。恕尚持其吏部銜。據濬上。會考察天下應覲官。奏黜而中旨留者九十餘員。言官有拾遺疏。復指其留而當黜者。下吏部。恕乃詳據各原考語。及所察知者。以聞。有旨未必實。令再詳訪具奏。恕自疑有沮之者。乃求去。益力。而上特慰留。居無何。太醫院判劉文泰奏。恕

矯詐强悍、妄行選補御醫吏目、非故事、及里居日、托人作傳而鏤行之、曰、大司馬三原王公傳、其疏辭不見行者、皆曰不報以彰。先帝拒諫之失、自比伊周、無人臣禮、有

旨、令恕看詳、回奏恕不懌、疏辯臣傳作於成化二十年、而致仕乃在二十二年、卽臣傳內所言皆昭。先帝納諫之

盛、何名彰惡文泰無賴、逞此機巧、非老於文學、陰謀詭計者不能、乞於午門而究文泰及主使之、人以正法紀、遂下

文泰錦衣獄、獄具謂文泰嘗謁丘濬語及恕傳、濬謂此直謗君、傳若行、上罪當不小、文泰自是心動、具奏欲論恕以語故爲民都御史、吳楨、楨亦爲奮晉、潤色文泰草而

授之因請逮恕及潛楨面質。上爲左文泰秩而責恕賣  
直沽名。俾焚其傳草而潛楨免究。恕意不能平。復上疏辯。  
不聽。於是再三懇疏引疾乞休。上乃許聽馳驛。有司月  
給廩二石。歲給夫二人。不賜勅。而文泰心怏怏。謂潛不能  
爲地。又二歲。潛卒。文泰往吊。其夫人叱之出。曰。爲若而使  
我相公齟王公。負不義名天下。何吊爲。時人快之。恕歷仕  
四十五年。家居健無恙。日說大學諸書。嘗言我耆老。方理  
會學問。而薦紳大夫過三原里者。必屏呵從走謁。再拜叩。  
質疑難。恕亦應之不少倦。如是者十餘年。而爲正德改元  
之歲。恕九十矣。天子遣行人齎手勅。半醴綵幣存問。益

月廩歲夫恕乃復疏言數事又三年卒恕噉食兼數人至其日小減閉戶獨坐忽有聲若雷白氣瀾漫遂瞑訃聞上予祭葬特超六官贈特進左柱國太師諡端毅恕有五子十三孫多賢且顯者而少子承裕仕至南京戶部尚書謚康僖有學行不隳其家聲

李夢陽曰國制文極六曹天造不論夏蹇經綸惛惛文皇北征全國是屬三楊熙績臺省坐臻太平所謂代天之相也英廟之遇文達密畫顯斷萬幾精覈局體一變成化間三原河州單縣封丘居則岳屹動則雷擊大事斧斷小細海蓄帷幄佞幸請劒必殛使見之者畏聞之者懾斯

其人歿生富貴足動之哉然較之天順以前則殊矣時與  
位不同邪委任權力殊邪弘治中華容洪洞鈞陽靈寶陽  
曲盧氏金陵安福咸稱名卿然志存納約行在精審苟濟  
其事小枉安焉局體又一變矣雖形迹用暴義遵矯直亦  
運數然與

少保姚文敏公

事

裕陵

景帝

茂陵

公名夔字大章桐廬人正統七年進士明年爲吏科給事  
中內艱闋復入科會虜變景帝監國議卽真公豫議有  
力景泰元年起陞南京刑部侍郎三年改南京禮部侍郎  
勅考察雲南諸吏四年還朝留禮部上不豫羣情洶洶



禮官方具議。上皇已復辟，調南京刑部。未幾召還，禮

天順二年，南陽薦改吏部。七年，代石琚爲尚書禮部。上

顧公儀度，奏對都雅，大喜。成化四年，睿皇后崩，議合葬

祔廟禮。上以孝肅太后故，輒報聞。公疏言：先帝治

命，錢后與我合葬，內閣無忘朕言。率百官伏文華殿門

哭諫。泰陵嘗見公及彭時疏，謂劉健曰：先朝大臣忠厚

爲國如此。五年，李秉去，商輅欲薦公。彭時欲薦王禕，而尹

旻又欲得尚書，相持久之。乃以崔恭爲尚書。是年六月，公

代崔。七年，滿九載，加太子少保。未幾卒，贈少保，諡文敏。成

化初，公言少保黃福得諡忠宣，土木成事大臣尚書王佐

鄺埜雖贈少保、未得易名、佐操存正大、經略弘遠、埜心術  
端介、處事嚴格、沒於王事、乞謚如福例、制曰可、謚佐忠簡、  
埜忠肅、尹旻字同仁、歷城人、正統十三年進士、入翰林、爲  
庶吉士、景泰間、歷戶吏二科給事中、天順初、遷通政司叅  
議、六年、督餉陝西、成化二年、陞吏部右侍郎、五年、轉左、歷  
佐王、李、劉、姚四公、九年代姚公尚書、累進太子少保、太子  
太保、太子太傅、二十二年、致仕、弘治十六年、卒、贈太保、謚  
恭簡、公選法通敏、賢愚皆說、端簡論曰、九臬執中、相繼在  
吏部、南人不喜、謂二公右北人也、時內閣南人、各欲用南  
人吏部、以故執中僅一年去、北人紛然、詆南黨善傾人內

閔不得已用克讓南人又不喜克讓數月去而大章入吏部出入五年北人爲之語曰斬却姚夔頭去祭王翺墓同仁代大章凡十三年內閣又指同仁爲北黨父子奪官去甚矣銓曹之難任也

太子少保李襄敏公

事

裕陵

景帝

公名秉字執中曹州人正統元年進士爲監察御史才識宏博議論持正已負公輔之望景泰二年以僉都御史總督宣府邊儲叅贊軍務三年秋瓦剌入貢上言迤北使臣納哈赤等三千人馬駝畜四萬餘匹除進貢外存養宣府日支草料宣府草不過二十萬束料二萬石我兵尚不給

何以供虜使、且永樂宣德間、虜使進馬、官驗不堪者、令虜  
草地牧放、不許入境、駐劄窺伺、正統間、許往牧大同、以故  
深知地利、數犯邊、今虜使畜多、謫詐之計、不可不防、是年  
衆巡撫尋改提督軍務、公遂薦葉盛、叅贊獨石諸城軍務、  
劾總兵紀廣、副總兵楊能、上曰、塞圍方棘、不得以細故  
掇大將、下巡按御史勘報、廣亦訴公專權、召公還京、以右  
通政蔣琳爲僉都御史、代公、言官交章請留公、上爲遣  
言官卽勘、改琳貴州鎮守、督軍務、公留宣府、四年、掩土木  
鷄兒嶺戰、沒遺骸萬五千、請下大同、紫荆諸鎮、並掩、九十  
數萬、是秋病、乞代、不許、許公一子視疾、後復起遼東巡撫、

公節用愛人、恩威兼濟、吏民畏而服之、又能識拔將校、斥遠烽火、塞上無大寇、深入卽小入、輒先覺、驅出塞卽已、以故邊民得休息、軍無冗費、虜亦知公名、輒徙帳避去、成化二年、董山誘海西寇遼東、公及武靖伯討降山、逮山至廣寧、誅之、徙其黨廣西、加太子少保、還臺、四年、入吏部、代鹽山爲尚書、五年春、致仕、先是、公與王竑竝以剛方負時望、坐廢、再起、巡撫、公遼東、王陝西、改淮揚、尋都給事中張寧薦公爲兵部尚書、王左都御史、葉盛入閣、時葉自廣遠入議事、御史呂洪言、公尤可薦、葉聲名損於嶺南、不可薦、薦公及王竑、上用王、兵部公都察院、葉亦改宣府、未幾、公

入吏部公在吏部時崔尹爲侍郎不相能適巡檢事爲考  
功郎中張環所持康御史以星變合諸言官乞汰京官且  
劾戶禮兵三部尚書馬昂姚夔程信并學士商輅康御史  
者與公善故諸大臣疑公公又請會臺官考察京官大臣  
被劾聽自陳上留姚程商而馬罷去有戴御史者請方  
面官復如正統間例聽在京三品以上大臣薦舉語稍稍  
侵吏部劉御史言薦舉開競門不可是年朝覲斥退者衆  
又多大臣姻黨兩侍郎時時短公蕭給事中遂劾公下廷  
議兩侍郎唯唯曰吾二人嘗言之奈不肯聽公遂致仕與  
來朝被斥官同弊竟快諸讒忌者蕭給事中又爲山西布

政使丘陵訐逮詔獄諸言官又疏言王梈欲入吏部彭

時爲內主以故遂秉彭不自安稱病商欲弭羣口請用崔

時局蓋一丁亥矣

侍郎吏部尹轉左葉陞右侍郎代尹康劉二御史蕭給事

中竝謫官公居家言官屢薦大臣忌其方鯁竟不起謚襄

敏

太子少保崔莊敏公

事

裕陵茂陵

景帝

公名恭字克讓廣宗人正統元年進士爲戶部主事有能  
譽出督延綏邊儲南陽薦知萊州府府庫故歲入漕海布

浥爛守者率破家公請量留漕海布餘竝出爲軍

布盡歸守庫者八百家十三年萊大旱蝗乞免

下邑逋租、明年虜犯京師、集兵數千、遣官部署、勤王在萊  
六年、吏畏民懷、景泰三年、陞湖廣右布政使、盡革諸冗費  
及和市、苗民侵武岡、督餉訓民兵、勦賊、賊皆聽撫、公安監  
利、流民相殺、公曰、勿急、急且大變、下令流民、願附籍者聽  
否、且俟秋成、遣歸、衆遂定、調左江西、囊中惟律比、圖書衣  
數襲、省有廣濟庫者、庫官吏乾沒五十萬、公劾其奸、賊行  
臺韓雍竟法、連坐布政使失職、郡邑肅然、制爲役法、調輕  
重任、一歲之勞、得九年之逸、天順二年、陞右副都御史、巡  
撫蘇松諸郡、所至進耆老、詢利害、爲興革、會都督徐恭、請  
浚儀真漕河、公役夫六萬人、程工贍廩、民不告勞、又浚常



鎮河、避江險四年。鹽山薦爲吏部左侍郎。成化五年，代李秉爲尚書。不久罷歸。九年，起爲南京吏部尚書。卒，贈太子少保。諡莊敏。公寬平坦易，中無芥蒂。臨事剛而不亢，柔而不襲。其在吏部，慎惜人才，獎拔後進。廉靖自居，人知畏憚。

尚書王莊毅公

事

裕陵

景帝

茂陵

公名竑，字公度，江夏人，成籍河州。正統四年進士，公正直。剛毅有經濟才，初爲戶科給事中。郕王監國，初坐午門，百官劾王振誤國，請彈文未起。錦衣指揮馬順振黨也，從旁叱言官去。公起，捽順首曰：「此正姦臣當誣誅！」百官批殺順，又索毛王二長隨監國爲擊歿，血清丹陛，內臣滌血儀。

長史曰勿滌爲若曹鑒俄遣都御史陳鑑籍振家并其黨  
是冬虜犯京師命公監守北城軍當是時北城諸將獨戰  
勝退虜京師解嚴公上言虜去不大挫必再至宜急爲戰  
守計勿遂謂無事陞僉都御史守居庸關訓練士卒繕塞  
以軍政一新又諭以大義感動羣心北門屹然尋病還  
京薦升公景泰二年總漕淮上三年兼巡撫清理鹽法  
賑濟劾巡河御史王珉貪淫謫珉戍開平會災傷公輒開  
倉賑而以狀聞迺自劾上曰賢哉都御史活我百姓勿  
劾四年少保陳循戶部尚書金濂皆言公心純政平委曲  
調劑弘濟民艱况總督漕運姦貪畏憚兼理巡撫兵民基

戴陞副都御史仍治淮安

唐皇帝復辟謫浙江參政事

除名編管江夏蓋

上皇猶記得是請我弟籍振者也居

半歲放歸田天順五年李來寇陝西我兵再敗京師曹賊

反傷二三大臣南陽薦起公視師會虜退再蒞淮上威行

惠戢聲望益重

茂陵卽位收用名賢陞兵部尚書時而

廣蟹大起公薦前侍郎韓雍有文武才宜令帥師討蟹而

雍新得罪衆難之公曰

天子方棄瑕錄瑜疑雍罪不當

用乃竝不以罪廢邪議始定公剛勇練於邊政而徇法多

忤三閭月請老去歸二十載乃卒正德中謚莊毅公與李

公秉皆一時名臣比居鄉公抗志寡交秉出里間博奕諧

謔公聞之曰、執中八座大臣、胡逐細民戲狎、不自愛、秉亦非公曰、所謂大臣者、豈立異鄉曲、矯激爲哉、

李贊曰、沉者自沉、浮者自浮、二公皆正一品也、唯相笑、故落第二、

熙朝名臣實錄卷十六

秣陵 焦 竑 輯

尚書王恭毅公

事 裕陵 茂陵

公名梈字同節廬陵人正統七年進士初授刑部主事歷  
陞員外郎郎中屢遷河南按察使所至案無留牘獄無冤  
詞天順初被誣下獄會襄憲王入朝上問所過官吏  
賢否王對曰臣過河南百姓遮道訴王廉使冤且言王廉  
使清勁鋤豪拊善有恩有威殿下幸爲百姓奏 皇帝還  
我王廉使 上喜立命法司雪公還任尋陞右副都御史  
巡撫陝西設法救荒全活數萬人流徙歸業天順七年遷

大理卿出入十年、凡兩法司及畿藩讞奏、參錯情法、多所平反、時吏諳律比者、類多深刻、公獨持明允、濟以長厚、諸所審駁、會文切理、倫要簡暢、轉相傳錄、類成卷籍、成化八年、遷刑部尚書、商文毅薦代姚文敏吏部、主議者不喜南人、竟用尹同仁、十年卒、謚恭毅、子臣、成化五年進士、翰林侍講、廣西叅政、

尚書陳康懿公

事

裕陵

茂陵

公名俊、字時英、莆田人、正統十三年進士、歷官戶部、征秋、青草、天津諸衛、公言舊負未蠲、新額浮積、人不能堪、詔減三十五萬、東、天順五年、兩廣合兵討叛蠻、公假便宜、勅

督軍興內艱起復明年蠻平解兵始得奔喪成化元年以戶部郎中陞南京太常少卿四年召爲戶部右侍郎公練習錢穀凡四方災傷邊鎮請芻粟爲裁盈縮條析利害曲折七年京師大飢勅公出太倉米百萬斛賑糶公禁絕射利者請石以上閉不與八年虜入河套兵出公督餉上便宜乞內帑助邊除徑道發丁飛輓軍興不乏榆林大捷進俸一等明年改吏部十三年侍郎九載陞南京戶部尚書歷吏兵二部又九載請老公孝友廉慎沉毅簡質南曹務開唯戶部金錢布穀出納與內外諸司相關多撓沮不可盡如法公一按典則制國用省財不啻數十萬卒謚康懿

都御史黃公

事

裕陵

景帝

茂陵

公名綬字用章封丘人曾祖思諫事孝陵掌太常事以

罪編氓沅州又徙戍平越公以故爲平越諸生舉雲南正統十三年進士行人歷南刑部郎中爲人廉直遇事臆登卽重忤時貴不恤人或笑黃郎中呆公正色抗言不爲移沮亦竟以是得名譚千戶者大猾任俠結懽貴顯人嘗奪民蘆場萬畝貴顯人業與譚千戶酒食往來卽知民枉不能直公竟盡法直蘆場歸民歷四川叅議叅政右布政使叅政時過崇慶忽旋風起輿前公曰卽有冤且散吾爲若理風遂止抵州沐而禱於城隍夢中若有神言州西寺云



云公密訪州西四十里有寺當孔道倚山爲巢公旦起率  
吏兵急抵寺盡繫諸僧諸僧中一人少而狀甚悍惡詰之  
無祠牒卽塗醋聖額上曬洗之隱有巾痕公曰是盜也卽  
訊諸僧不能隱盡得其奸狀蓋寺西有巨塘夜殺投宿人  
沉塘中衆共分其囊貲有妻女則又分其妻女匿妻女隱  
窖中恣淫毒久矣公盡按律殺僧毀其寺倉吏倚王親便  
沒官糧萬計王曲庇倉吏公竟按如法公爲錢穀吏精律  
比輒能發摘奸伏威行川中青神令聞風解印綬去右使  
時奏閉建昌礦爲左使湖廣妖僧繼曉至公曰繼曉以妖  
術故不離上左右今且得罪雖名掃墓實逸賊檄武昌府

館之後堂好飲食無令得出入俄事敗檻送京師伏誅副都御史巡撫延綏効叅將郭鏞等擒豪奸張綱公行道望見川中飲馬婦片布遮下體俯首歎息曰令健兒貧至此我何面目臨其上乎亟令豫出餉三月邊健兒素貧苦而延綏特甚大臣名爲巡撫健兒雖凍餓死不問延綏人忠朴聞公歎人人感泣願出死力爲黃都堂一戰已爲尚書戶部威稜截然盡革財賦內外諸積弊改左都御史入臺天下仰望其風采公憇直崖異常忤人自恐伏禍不可測請老去未幾卒

太子太保項襄毅公

事

裕陵

景帝

茂陵

公名忠字蓋臣嘉興人正統七年進士爲刑部主事陞員外郎扈上北征得走還漸陞廣東按察副使天順三年陞陝西按察使內艱陝人數千里赴闕乞留乃奪服還任及徵入爲大理卿陝人復詣闕乞留改右副都御史陝西巡撫成化元年虜入延綏公及寧遠伯擊虜遁去明年又與彰武伯破虜四年固原土達滿四叛據石城遠近戒嚴勅公總督軍務將兵往討時伏羌伯毛忠戰歿我軍遽退公卽陣斬指揮以徇陣始定移兵據賊水草困賊兵部恐賊來乘請詔問公當濟師否公不請濟師進與賊相持百日賊稍急公隨二卒單騎抵賊寨曉以禍福諸脅從賊

日相率來降。賊有愛將楊虎狸者。被我擒。公叱令斫頭來。虎狸伏地乞宥。死自效。公卽假以詞色。許令立功。解金鉤束。賜虎狸遣去。故滿四竟爲虎狸所誘擒。凡斬首七千六百。俘獲無筭。公因陳四事爲經久計。是時兵事急。訛言洶洶。公督軍矢石雨下。無懼色。嘗歎曰。奉命討賊。久無功。甘心效死矣。鈞陽服公勇毅。徇國召還。仍協理院事。故馬端肅公每語人曰。土達鷙猛。關中根本。四未平時。朝野洶洶。使其得志。天下事未可知也。項公畢竭心力。露宿原野者六十餘日。躬冒矢石者二十餘戰。始克獲醜獻。誠殄平巨寇。而止進一階。較諸趙輔劉聚王越封拜如寄者。不無功。

懋賞薄之疑矣。六年大旱，荆襄流民咸遁入山。李鬻子者，劉千斤黨也，倡流民爲亂，復勅公出總督軍務。公遣人持榜入山諭降，卽負險不服，縱兵擒勦不赦。凡遣還鄉者四十餘萬，編戍者萬餘，俘斬二千。因上便宜十事。詔暫留撫治。進左都御史，會有星孛天田，言官因論荆襄妄殺，公再疏自列乞歸，不許。八年，又討平野王剛、小王洪，召還院，荆襄以公處置得宜，三十餘年賊不起，而議者猶指公妄殺致干天和，交章論奏。故公辯疏略曰：臣忠肅將天威，克平逋寇，不意媚疾流言，仰賁宸聽。今廷臣之所指，兵科之所糾，兵部之所叅駁，大率謂臣以流寓良民作盜賊。

俘獻京以無罪編民作從賊謫戍邊以久居僑民作無籍逐還鄉至謂祛殺慘酷甚于夷狄彗出旱傷皆臣所致又謂奏報與功冊級數不符不宜陞賞臣若不辯何由自明竊唯荆襄自劉千斤和尚王彪就擒而後有李鬍子王洪燃燼煽禍千百成羣遠近荼毒今臣奉命總師與李震等督兵悉捕僅俘百餘詣京皆首惡也科臣乃謂盡良家子而洪司聽其翻異不知前巡撫楊璿叅將王信等屢奏猖獗難禦者誰邪其餘賊黨不忍濫誅簡其丁壯謫發邊戍而家屬從之非無罪者流民附籍百無一二如光化縣陳長千籍雖有之然占山四十餘里招聚無賴一千餘衆

爭鬪劫殺無日無之可以久居之故不遣乎若非近山州縣則固仍其附籍而未嘗遣也臣始因嘯聚揭榜諭之謂荆襄山中已殺數千蓋張虛聲怵之使解散耳彼時原屬烏有今計殺傷囚繫死者實不過千較昨討劉千斤擒殺至數十萬者何如哉科臣乃謂慘于夷狄而致豈出早傷亦誠厚誣矣軍中報捷初未及詳斬獲的數每多冒濫其後核功定籍百不存一雖擒李鬍子王洪輩以將士爭邀首功臣皆革去不錄如功少報多敢曰無弊今報止一百二十餘級反加叅駁奚以服人且兵部尚書白圭亦嘗親蒞此地親任此事矣今日之舉乃圭往日之遺患也若以

今日之功不宜陞賞則往擒劉千斤尚遺後患而得高擢厚賞者蓋亦少思乎今臣已遣回流民一百五十餘萬謫戍賊黨一萬二百有奇隨居家屬五萬九千餘四省境內帖然安矣先時中外皆慮荆襄禍患何日得寧今旣平靖而流言沸騰反以臣爲口實昔馬援征南蒙薏苡之謗鄧艾伐蜀來檻車之徵非唯功不見錄反致身且不保今幸遭聖明不加罪譴伏乞投閒賜臣致仕奏入帝曰荆襄事已成功雖有浮言朕皆不聽今覽卿奏事理益明卿何嫌何疑遽告退避所辭不允十年代王槃爲刑部尚書十一年爲兵部尚書代白圭公以職方最屬要樞卽調劉



忠宣公大夏、陸文量公容爲郎、時有錦衣百戶韋瑛者、挾  
汪直爲訶察、屢興大獄、擅執京朝官、中外重足、莫敢正言。  
公發憤草疏、約吏部尚書尹旻諸公卿、發直瑛奸罪、或先  
漏言於直、而尹旻又先送疏草與直、幸上明聖大怒、罷  
直、瑛戍邊、而直見上、獨泣言此內臣黃賜、陳祖生中  
傷奴、御史戴縉因而言直奉法無他、以迎上意、故上  
復令直照舊領廠、直遂首誣公、下廷訊、事本起於千戶吳  
綬、綬在楚軍中、撓法、公急奏取回、因而附直用事、構公公  
廷辯落職去、久之、諸奸次第敗、乃復公兵部尚書、致仕、劉  
忠宣曰、公平土達流賊功、較諸臣爲最、而官未延世、奈何、

此可以見公道矣。初直用事，諸大臣耻與往來，已而一二大臣首結直，於是商文毅公首乞去，都御史李賓刑部尚書董方戶部薛遠兵部侍郎程萬里繼去，翁世資代遠，余子俊代公。公家居二十六年卒，贈太子太保，謚襄毅。皆馬鈞陽諸公之力也。公明果倜儻，曉暢軍務，直言正色，不屑詭隨。子綬，孫錫，舉進士，綬爲江西叅政，錫爲南光祿卿。錫兄鏞以公功，世蘇州衛指揮，錫子治元嘉靖丙辰進士。逸史氏曰：韓雍罷二廣，五載而卒，項忠先雍舉進士，至弘治初猶無恙，給事御史交薦不起，八十餘乃卒，俱謚襄毅也。

年譜曰禿堅子留公牧馬于沙場公胡服挾所收二良馬乘之間道走望斗而南越四日夜馬疲乃棄馬潛步忽遇一山崖險路絕攀援而上至山半飢憊且行且仆倚石飲歛忽見松下有物塊然遺于路視之乃肉乾公噉肉吸泉復起行若有扶掖之者遠見胡騎出沒恐爲所獲晝匿夜趨凡七日夜始達宣府會御史張公昊按宣府開關納之旣見仆地移時乃甦視其足有刺蒺藜百數而公不知也時都御史羅公亨信爲巡撫來視公令人拔之竟日乃盡不能履臥調上谷兩月餘始能起步

又曰時朝廷好寶玩中貴言宣德中嘗遣太監王三保使

西洋獲奇珍異寶無算。帝乃命中貴至部查王三保至西洋時水程。時劉大夏爲郎。公令都吏檢故牘。劉公先檢得匿之。都吏檢不得。復令他吏檢。公詰都吏曰。署中牘焉得失。劉公微笑曰。王三保下西洋時。費錢穀數十萬。軍民灰者亦萬計。此一時弊政。牘卽在。尚宜毀之以拔其根。猶追究其有無邪。公聳然再揖而謝。指其位曰。公達國體。此不久屬公矣。

陳建曰。嗚呼。土木之變。文武冠紳。歿于虜者何限。而公與李文達。白恭敏。周莊懿。蕭文昭。諸公。皆出一生於萬。歿非諸公。勲名事業。有命自天。幾何不爲無定河邊骨耶。又曰。

項襄毅坐困叛四可比趙充國之坐困西羌而彭文憲商  
文毅主議不移不媿魏相朝廷有人社稷之福也使當  
時叛四不殄而與套虜連兵則誠可懼然則京軍雖往徒  
費餉搖人心何益邪

太保余肅敏公

事

景帝

裕陵

茂陵

公名子俊字士英青神人景泰二年進士歷戶曹郎擢知  
西安府西安關中會府也民事戎務諸節鎮大臣使車往  
來極冗繁難治公從容酬酢而上下皆平悅之西安城中  
水鹹民飲輒病公爲開新渠引山泉匝徧城市人得戶汲  
至今便利號曰余公渠公又鑿山開道瀉斥鹵灌田千有

餘頃歷陞左布政轉副都御史巡撫延綏延綏自正統中  
都督王禎鎮守榆林未城也禎始城榆林及十八寨移鎮  
榆林尚未衛也成化七年始置衛八年公請復廣榆林城  
增添三十六營堡盡補陝中伍籍之脫落及罪謫南戍子  
孫不能南風土者皆聽還伍以實榆林建學立官師擇其  
少者爲弟子員於是邊有城堡軍士得勤力以樹蔬果并  
開界石外地使興屯田歲得糧十餘萬石而榆林始爲重  
鎮矣東渡河連大同西接寧夏虜不敢復恣肆出入公又  
上疏言陝西有三邊延慶寧夏甘肅三邊之中延慶爲內  
地國初逐出北虜遠遁黃河外至正統初渡河犯近邊始

於沿邊立界石。創營堡。築墩臺。天順以來。虜知東西諸邊各據險以守。難窺伺。唯延慶一帶。地無險阻。可以馳突。屢來犯邊。竊我邊人爲鄉導。遂知河套所在。入屯其中。自是虜顧居內。而我列屯守禦。反在其外。臣以爲莫若干沿邊一帶。墩臺空處。築爲邊牆。立砦堡。凡舊界石一帶。多高山陡崖。依山形。隨地勢。或削削。或累築。或挑塹。綿引相機。以爲邊牆。實便報可。於是東起清水營。紫城砦。西接寧夏花馬池。東西二千里。每二三里間。爲對角敵臺。砦連比不絕。空處築牆。如新月狀。以偵敵。避射。凡堡十有二。崖砦八百一十九。小墩七十有八。大墩一十五。自是虜寇益稀矣。十

二年、移鎮陝西、十三年、入兵部爲尚書、公在邊日久、熟知虜情、及將校勇怯、地理險易、遠近虜所出入、故凡邊臣奏請、從中調度、輒中機宜、未幾、致仕、復召加太子太保、改戶部、公又能知錢穀經費、曲筭盈縮、諸吏少年敏悟者、皆自謂不及也、十八年、又召公出總督宣府大同山西三關軍務、公言禦虜利用戰車、條式奏上、二十二年、再出宣大還京、以左都御史致仕、復召公爲兵部尚書、公乞致仕、不肯出、公平生仕宦多在西北、故榆林修邊之功爲最、已而人兵部出邊鎮、欲推榆林法、盡修大同宣府兩鎮邊牆、而沮於讒忌、功有緒、竟不能就、唯鎮榆林時、怨謗紛起、堅執不



捷卒能成功、垂利百世也。公卒年六十一、贈太保、謚肅敏。  
時羅山徐廷璋、巡撫寧夏、亦浚濠築牆、繕亭障、有功賞、而  
鈞陽巡撫陝西亦大有名、故稱關中三巡撫云。廷璋由選  
舉。

都御史韓襄毅公

事

景帝

裕陵

茂陵

從榮  
公

公名雍、字永熙、吳人也。弱冠舉進士、選授監察御史、尋奉  
命錄囚碭山、教諭丘純責膳夫丘磨兒、磨兒父教令逃去、  
因訴他御史純筆次吾子、他御史榜掠純、強自誣服、然無  
所得屍、黃河撈一浮體、支解者、父廼哭吾兒也。于是純坐  
極刑、雍疑之、蹤跡得磨兒、純始自、久之、出巡按江西、衆猶

謂雍年少未經事，雍抵鎮，振刷精彩，經措宏久。後先皆弗如也。廬陵饑，盜大起，雍從巡撫侍郎楊寧謀，設伏捕首虜二百餘，餘孽以次伏誅。楊寧見雍輒自失，曰：「御史卽少而老於吏，是聰明百寧何可當！」大學士陳循廬陵人，熟知雍才，言於上，擢僉都御史，代寧巡撫。雍時未三十，黜屬吏奸貪，疏滯獄，均徭役，平市價，恩威大著。英宗皇帝狩土木虜猖獗，西南夷繼叛，諸省無不被兵。獨江西恃雍少安。息。英宗復辟，下陳循獄，謫戍。雍坐調山西副使尋罷歸。一載召拜大理右少卿，復右僉都御史，協理都察院事。長院者寇深，剛愎少許可，迺獨心敬雍。雍亦時時有所瞻益。

石亨誅錦衣指揮劉敬坐直所邀亨午具用朋黨律罪。來  
雅抗言朋黨者阿比共亂朝政。今以一飯當之。恐過重。亨  
盛時大臣中固有朝夕趨其門宴會且累時。今不坐獨坐  
敬何也。敬卒不歿。虜復寇掠內地。制詔雅巡撫大同。宜  
府陞辭。賜宴及鈔。雅至。則虜已遁。修戰守。練卒。固城堡。爲  
一時北方之重。七年還議事。上喜公狀貌。進兵部侍郎。  
諭南陽曰。九邊撫臣宜得如雅者。南陽復薦山東按察使  
王越。代公。越至。見上。上又喜曰。是真將官。英宗崩。內  
閣學士陳文忠雅因事聞于大學士李賢。左遷浙江叅政。  
雅爲叅政。頗不理省務。日選勝從賓客。曲宴西湖。賦詩自

娛。純皇帝初兩廣蠻寇復大起拜都督趙輔征夷將軍  
發湖湘閩廣土漢兵討之兵部尚書王竑言于朝曰韓雍  
才氣無雙盜事非雍莫可雍舊有過請置勿計於是使使  
就浙江拜韓雍左僉都御史贊理諸軍務雍即日拜命會  
衆議進取或請分軍戍賊入廣西可破雍曰不然古仗鉞  
臨戎制關外謂利國家得專之也夫兵有合爲正分爲奇  
者二廣地鮮完郡大藤峽爲賊藪本也諸軍不先薄其本  
適分兵以趨末分兵勢弱趨末難盡我全師至彼南可以  
攻大廉授高廉雷東可以應南部西可以取柳慶北可以  
斷陽峒諸路勢若常山蛇首尾互應彼分而拒我聚而攻

江地理  
自了然  
六得左  
之腹

志曰先人有奪人之心茲行必勝我奪之矣遂行會趙輔  
知雅才軍事一聽雅于是督大兵分道進擊賊直抵大藤  
峽道有儒生里老數百人跪持香曰我輩苦賊久矣今日  
幸遇天兵得生爲良民願先三軍鋒雅大怒顧左右叱曰  
此皆賊耳縛斬之左右初亦疑旣縛而袂中利刃出乃悉  
斷頸散手足剗腸胃分掛箐棘中累累相屬賊大驚沮曰  
韓公天威也遂破之前後斬獲四萬一千七十六有奇捷  
上 天子大嘉賞雅功制 詔卽軍中拜雅左副都御史  
賜文綵幣六官一子錦衣鎮撫雅請以讓其弟 詔可雅  
復獻策二廣賊勢實相聯屬於是命雅總督軍務撫鎮兩

下咸聽約束。雍既得以便宜行，益修飭陣伍，擇別將分據窮黨與功最鉅，進都察院右都御史。雍威嚴擬王公三司長吏，見長跪白事，促縮如小吏。軍門設銅鼓數千，儀節詳密，賓佐皆極一時之選。

鄭端簡曰：公言自古蠻夷來寇，不可以禮義較，唯戰勝自戰。叔敖云：寧我薄人，軍志曰：先人有奪人之心，薄之也。兵貴拙速，不尚巧遲。於是衆從公會，諸軍出東道，遣裨將平陽峒諸賊，又進平修仁，荔浦諸峒，遂直抵大藤峽，奪其險，塞焚其積聚，四面交攻，斬俘四萬一千有奇，盡降其餘黨，斬其藤，改爲斷藤峽，置藤縣千戶所，控賊出入，刻石紀功。

班師四年、公言嶺東西地廣山深、恐餘孽復作、宜預爲擇  
壓、請得文武大臣分理。六年、陞右都御史、總督兼巡撫開  
府梧州。公得承制專決、盡法繩下、不貸大吏。以故謗議遂  
起。內臣黃沁忌公束縛不得肆、嗾人上書誣公。上爲遣  
使卽訊。公引疾乞歸。卒。年五十三。謚襄毅。公洞達凱爽、篤  
於孝友、與人交有信義、不爲岸谷。臨戎蒞政、豹變鵬搏、雖  
發奸摘伏而事簡心平。江西嶺南莫不畏如神明、愛如父  
母。攜詞酒翰、風生泉湧。天才逸發。

逸史氏曰：雍稚少時多奇跡。至今鄉里能誦道之近怪故  
弗悉。二廣士大夫每屈指雍曰：此百世功也。大藤峽天陰。

賊蟠據無敢窺。雍及王守仁兩至之信然哉。

布政陶公

事 茂陵

公名魯字自強，鬱林人。父成爲按察副使，從擊賊兵敗。公之。上旌死事者，贈官錄一千入冑監，魯補焉。二十授廣東新會丞。魯機明內蘊而神觀不足，或從令尉列見上官，獨昏睡，雖督榜不恤也。大藤峽諸賊亂，二廣都御史韓雍總師討之，檄魯隸麾下。雍威嚴擬王者，二司長吏見長跪白事，惴惴若不自勝。一日顧峒賊最強險難下者，左設策。魯時直膳侍左右，漫謂曰：「丞揣我何意？」魯曰：「得非某賊耶？」雍曰：「然，丞能往否？」曰：「匪直能且易耳。」雍怒曰：「賊銳甚，又



據阻自衛、非大兵不可入。部下文武數百千人、熟視無可  
當。吾寄者、吾方欲身往、安得易。且使若食粟能之耳。嚴爾  
邑、不能理、乃言擊賊。若安當管。魯不拜、抗言曰、夫賊難攻  
者、非賊難也、我難其攻賊者也。謂魯解食粟不解擊賊者、  
明公未悉魯也。蔣琬、龐統、廢邑事後、乃爲蜀名臣、公幸毋  
棄魯、使得畢伎、當悉縛諸醜、以獻。雍異之、改容曰、若所將  
幾何而辦。曰、三百人足矣。曰、何少也。曰、魯猶以爲多、兵貴  
精、請任選擇。雍曰、任爲之。魯乃標式約曰、有能力舉百鈞、  
矢射二百步者來。二軍之士、十五萬人、其比于式者、得二  
百五十人。曰、未也。請復下令募。募數日、足。魯乃爲別將、日

操練陣法、椎牛酒犒、甘苦共之、士爭願爲、成率以先登、大破賊、斬首無筭、賊穴所得士女金帛、悉以分於三百人、已無與者、衆益奮、韓雍大稱賞、言于朝、擢爲令、累功進同知肇慶府事、按察僉事、副使、左右布政使、錄其後爲錦衣千戶、魯前後任廣東所殺及降者二萬七千餘、賊聞陶家軍、駭慄遁避不及、遇卽叩首乞爲良民、得無死、幸甚、然此三百人耳、服其心、累用不贖、語有之一夫決萬夫避况三百人乎、

逸史氏曰、士有遇有不遇、魯雖才、非韓雍、幾失魯

太子少保程襄毅公

事

景帝

裕陵

茂陵

公名信字彥實休寧人生於河間正統七年進士十年選給事中吏科景帝卽位疏薦起薛文清瑄虜犯京師公監軍守西城上五事都督孫鏜禦虜西城失利鏜急呼城門求入公疏言鏜小失利卽開城納鏜虜益張人心益危趣鏜戰必效來力上立詔勿納鏜虜逼城鏜兵亦附城戰公與都督王通都御史楊善城上鼓譟發鎗礮佐鏜虜退遂請勅石總兵于少保移營開廂外禦虜號令諸將景泰元年使司還廷議奉迎上皇有龔千戶者投密書高穀家言禮宜厚語漸聞莫敢發公倡同列會疏入明年上中興固本十策又明年上修德疏陞公及葉文莊公叅政

山東山西公至遼東憂去六年服闋改四川理餉松番天  
順元年入賀會錄景泰間進言者陞公太僕卿公案故事  
理營衛馬三營大將石亨孫鏗曹欽並疏言太僕苛急請  
馬隸兵部太僕寺言高皇帝諭馬數勿令人知今隸兵  
部馬登耗太僕不得聞卽有警馬不給請以責兵部上  
是公言復歸太僕二年陞僉都御史巡撫遼東建州酋董  
山通朝鮮受僞制爲中樞密使公廉得僞制疏請先發伐  
其謀上爲遣給事中使朝鮮錦衣譯官出建州董山匿  
不承出僞制示之皆愕懼乞貢馬謝罪遼東總兵海寧伯  
董興倚吉祚姻又昵都指揮夏霖恣不法分巡僉事胡鼎

發霖奸賊罪四十事、公條上。詔錦衣指揮郭英逮霖籍其家、英得霖貨末減霖寇深、遂劾公、惑外臺官、潰聖聽。詔詰公、不肯引咎、徵下詔獄、調南京太僕少卿。五年召還、侍郎刑部憂去。成化元年、起爲兵部侍郎、當是時、兩廣川陝荆襄諸路用兵、獨署部區畫方略、皆中機宜。先是四川貴州山都掌蠻叛、兩鎮守將不相下、兵久無功、朝議遣憲大臣督戰、科道官在軍中者、忽告捷得賞、未幾諸蠻又叛、據大壩山、箐險破合江上九縣、三年進、公尚書督軍、與襄城伯李瑾發川廣雲貴番漢兵討賊、公至永寧、分大軍三道、自督入金鷺池、四川軍由戎縣、貴州軍由芒部、雲南軍

由普市入期會大壩大軍進至李子關渡船鋪賊恃險拒敵飛梭下礮石如雨我軍發神鎗勁弩賊稍却攀崖而上順風舉火焚其龍背豹尾二寨賊退保大壩貴州已踣其後四川雲南軍角其左右矣賊驚散不支連破諸賊寨斬首五千擒二千餘賊復走入天井水磨二洞洞窾幽暗不可入室洞圍守月餘賊灰幾盡九姓土獠附賊乘還師撲勦又大捷請移瀘州渡航鋪控諸蠻分山都掌故地隸永寧芒部更大壩爲太平川立長官司轄熟夷論功兼大理卿言官論公上首虜不實公四疏請老不允七年春無雨雪公應詔條關政言兵事可更張者四兵弊可申理者五

其大者、延綬兩廣歲遭殺掠、邊以捷聞、朝以捷賀、上下相蒙、戎夷益肆、四方流民盡聚荆襄、不早區畫、變起中上、天子六師、馭輕居重、京營士馬疲耗、器甲頓朽、非大更張、緩急可憂、是歲改南部、叅贊機務、公曰、叅贊謹非常有司事、非所預、八年、令南都大臣言興利除害三十餘事、乞召還給事中王徽、劾退南京守臣應城伯孫繼先、明年致仕、又明年卒、贈太子少保、諡襄毅、以功得世錦衣百戶、先是虜久據河套中、議遣大同守將楊信將兵十萬搜套、公執不可、公征南蠻、制詞賞殺皆得專斷、迄班師不敢賞殺一人、曰、刑賞天子大柄、願闕外事不易集、假大臣東攝人

卽幸事集、輒自專、非分也。

侍郎葉文莊公

事

裕陵

景帝

茂陵

公名盛、字與中、崑山人、正統十年進士、授兵科給事中、已  
巳之變、率同列請誅將臣、扈從失律者、然後練兵、選將、誅  
虜、復讐、一日三疏、虜退、請明賞罰、言效勞如孫鏜、歿事如  
謝澤、韓清、宜賞以示勸、守關不嚴、赴難不力、不可不罰、以  
示懲、陞都給事中、監守城兵、劾于少保、德勝之捷、時北虜  
方張、大臣有奏留邊兵守京師者、公言、今日之事、邊關爲  
急、往者獨石、馬營、不棄、則六師何以陷土木、紫荆、白羊、不  
破、則虜騎何以薄都城、邊關不固、縱守京師、不過保九門、



耳、急宜固守。宣府居庸使、會河南陳州流民聚爲變、勅公往視、稍解散、得安輯。景泰元年春、還朝、疏進及名書請迎駕者、留中。三年、遷山西右叅政、督宣府軍餉、尋以李秉薦、協贊獨石諸城守備都督孫安軍務、獨石馬營八城被虜、殘毀、列上利害可興革八條、又設暖舖便行旅、均疏圍給將士、瞻、夾扶傷、纖悉備具、又請官銀五千兩買牛千頭、摘戍卒不任戰者屯田、給軍中諸費。七年、外艱去。天順二年、召爲右僉都御史、巡撫兩廣、請令鹽商入米餉邊、與都督顏彪破賊砦八百所、斬首萬級。八年、移鎮宣府、代李秉修建屯堡、虜至烽堠輒發、不得掠人畜。公在兩廣時、丘文莊

不喜公以故李文達亦惡公遂有謗公殺降至斥公勞擾  
嶺南者成化二年文達卒上欲得人入內閣勅王忠肅  
公慎簡內閣忠肅公薦柯潛萬安劉定之吳節及公五人  
上用定之四年陞公禮部侍郎五年改吏部六年賑畿內  
八年北虜入河套議增兵設險或請大舉搜套驅虜出河  
外沿河築城堡抵東勝徙民耕守其中勅公往議方略上  
言搜河套復東勝未可輕議唯增兵守險可爲遠圖宜令  
守臣剗剗邊牆增築城堡收新軍以實邊選土兵以助守  
便上從之九年轉左侍郎未幾卒年五十五謚文莊公  
博學宏才清修苦節每稱慕范希文惜其未獲柄用當是

時慎舉諫官如公及姚夔尹聰尹旻張寧輩皆其選也尹  
嘗問張宣德以來科中人物誰第一張曰季聰尹曰季聰  
何敢望與中

太師馬端肅公

事

景帝  
泰陵

裕陵  
康陵

茂陵

公名文升字負圖河南鈞州人生而有異兆貌瓌奇多膂  
力嘗與羣兒戲十數爲羣角之靡不仆年二十六登景泰  
二年進士吏部尚書王直異其材選授監察御史時領院  
事者王文王翱皆嚴重鮮可而獨以文升爲國器出按山  
西再按湖廣所至發奸摘伏有神君之稱還領全臺章奏  
以母憂歸服除超拜福建按察使鎮守中貴人虐而肆獨

文升能制之、使稍稍斂戢、進南京大理寺卿、丁父憂、成化  
初、固原土夷滿四、與其黨劫其從子指揮璫、據石城以叛、  
陝西巡撫與中貴人將討之、大敗、復合寧夏延綏兵討之、  
又大敗、詔逮巡撫諸臣下獄、而卽家超拜文升右副都  
御史、代爲巡撫、佐總督都御史項忠、率京邊諸軍五萬討  
賊、文升馳急傳、十日至陝、時兵已發、則簡練其留後者、申  
約束、通轉餉、五日而嚴馳至軍、偕項忠屯中路、文升言於  
項忠、使盡焚城傍草、斷汲路、賊始稍稍困、石城潰、先後俘  
斬首虜七千六百有奇、獲其男女老弱二千六百、提闕進  
文升左副都御史、賜金帛、遂疏言時事十五條、及興戎三

下方困於兵、會貴州都勻苗叛、守臣請合三鎮兵遣討、文升不可、惟遣官勘處、卒無他也、時上幸方士李孜省、欲有所薦引、代文升、忽有中旨、調文升南京兵部尚書、參贊機務、孝宗皇帝立、召改都察院左都御史、上躬耕籍田、旣宴、而教坊以雜伎進、出褻語、文升正色曰、汝曹第陳農家作苦、使新天子知稼穡艱而已、褻語何爲、公卿愧之、文升乃復條上十五事、上皆爲嘉納、特命提督十二團營兵馬、掌院事如故、時子總以鄉貢士待選、文升使請外、曰、必大臣子而京秩、誰當外者、尋復爲兵部尚書、京師大水、上疏陳時事、於貴幸多所侵、又嚴殿六軍諸校斥

其貪黷選悞者二十餘人以是有怨家夜持弓矢警文升門又飛書射入東長安門內事聞上嚴令錦衣官校緝訪而給金吾騎士十二出入爲文升衛文升因乞休優詔不許屬文升有小疾而虜小王子以數萬騎駐大同邊外勢洶洶上使中貴人挾醫視文升疾賜上尊餽餽因問計文升謂此虜方敗于他部勢已絀無能爲也請密爲之備而揚聲逼之虜果徙去安南侵奪占城五州地詔勒還之數支吾不服會二國各入貢乃請面折諸廷安南詞服因諭以恩威利害厚賜之歸還其侵地廣西土守岑欽與侄溥相讐殺巡撫欲討之文升不許第令騰書戒飭

已皆悔悟、納款請降、時南畿浙江大水、河南山東山西陝西旱、文升請亟勅撫臣發庾以賑、遣使崇祀羣神、爲民祈請、馬政弊甚、民苦孳生寄養、請覆覈減定其額、著爲令、特加太子少保、久之、又加太子太保、有旨傳陞、盡工張玘等二十七員、爲錦衣千戶、文升力諍、謂此先朝弊孔、賴上初窒之、今復啓之、無功而冒武職、徒使邊將解體也、江南歲侵、有司請募民入粟、授以指揮等官、文升復諍、以爲授之指揮、亦能使邊將解體、只宜授散官、上皆爲停、哈密忠順王者、故元遺孽、文皇帝寵其王、予金印、使率其民、城哈密居之、以通西域貢道、其位高而兵最弱、忠順王

灰王母當國爲土魯番酋鎖檀阿力所擒，商人畜併奪金印去，鎖檀阿力灰子阿黑麻立以金印歸我。文升請以王母之甥陝巴爲忠順王，填之。阿黑麻怨我賞薄，謂陝巴賤種也，何得王哈密？復輕兵入虜，陝巴及金印去，而使其驍將牙木蘭以三百騎入守。文升奏請執阿黑麻之貢使，寫亦滿速兒等四十餘人流聞廣而薦都御史許進撫甘肅，使率副將彭清等選番漢兵倍道而至，夜坎城登破之，斬級六十，降自保者八百人。牙木蘭以千里馬走謁阿黑麻，阿黑麻方與赤斤蒙古衛相讐攻，不能大發兵，使別將將輕騎五百圖復哈密，復爲赤斤衛兵所微殺，乃遣使上書。



謝罪請歸陝巴及金印於是文升亦奏還其貢使馴以少金帛而哈密復皇清寧宮災

當時大臣能悉心謀國不拘拘職守也 太皇太后 皇太后同居

仁壽宮 上命文升與工部亟議修建文升言團營軍筑

於役不可復苦楚蜀災不勝採伐三畝有儲木尚可材太

僕馬惜薪薪其價可以資工匠木石費倘不足則幸發內

帑金數萬足之故落成而公私不告匱 皇太后徙居懋

甚予文升一子錦衣百戶賜錦幣履等北虜火師大入邊

殺掠吏民 上憂之召對便殿賜酒饌給筆札詢以戰守

之策虜雖詎竟不能深入而會吏部缺尚書卽首推文升

給事中亦言吏部非文升不可乃用倪岳而特加文升

傳十四年岳卒文升乃爲吏部尚書明年加太子太傅七年上召文升至暖閣諭之曰明年入下覲吏畢集卿其用心採訪大彰黜陟文升頓首曰陛下圖治若此崇社之福也上乃令中貴人掖文升下階後至考察京僚給事中吳葬王蓋自以躁妄當斥因先事誣文升及都御史戴珊欲兩持以解文升曰吾安可市名而廢法乎悉署去之滿九載加少師兼太子太師上崩梓宮當出德勝門文升徒步號哭二十餘里不稱疾武宗立吉凶之費計黃金五千兩白金百八十萬兩戶部計無所之欲裁諸王賜併借公侯勛親莊田租課文升言人主卽位例推

恩、恩未下而先奪之、非禮也。御馬監太監王瑞謂造大婚  
禮器物、應用儒士李鼎等七人、楷篆西天西番字、已得請  
矣。文升力持之曰、此曹皆昔考察無行、且不良於書、今復  
用之、何以杜倖門、乃別選八人以進。瑞慙恚、誣文升抗  
旨。文升因乞歸、不許。當是時、幾已內移、而文升居位久、左  
侍郎焦芳日夜覲之、會楚人熊繡爲兵部左侍郎、文升推  
出兩廣總制、不欲行。流言布聞、其同鄉御史何天衢因劾  
文升衰老。文升二十一疏乞歸、乃報許。而御史王時中又  
謂兵部尚書劉大夏、刑部尚書閔珪謀代文升、故爲文升  
劾大夏珪。二公去、二公皆賢、旣相繼去、而焦芳坐得文升

位矣。文升之去，人主尚優禮賜勅，予寶鑑錦綵，馳驛以行。月給祿米六石，歲給人夫八名，供帳傾都。又三年，焦芳構于中貴人瑾，削文升官秩。正德五年卒，年八十五。明年瑾誅，芳斥，復贈太傅，諡端肅，予祭葬。嘉靖初，加贈特進左柱國太師。文升之卒無幾，而大盜趙鐸亂河南，行剽至鈞州，以文升家在，捨弗攻。攻破泌陽，前大學士焦芳已跳匿燬其家，發芳篋，取其衣冠縛葦若人者而屠裂之，曰：「恨不爲天下殺此賊！」

少保秦襄毅公

事

景帝

裕陵

茂陵

泰陵

康陵

公名紘，字世纓，單人。景泰二年進士，初爲南京御史，有風

裁勅中官降北黃驛丞御史陳綱薦知雄縣禁中官捕獵  
被誣得禍幾不測民數千走擊登聞鼓訟寃得宥調知府  
谷縣陞知葭州調秦州成化中爲鞏昌知府十三年陞陝  
西叅政有軍功坐事調廣西十八年陞僉都御史巡撫宣  
府破虜柴溝堡及巡撫陝西時秦府旗校肆橫悉擒治不  
少貸王許公陵親王茂陵怒逮公詔獄命內臣尚亨籍  
其家得黃絹一疋故衣數事亨還言公貧狀上親閱其  
貲嘉歎良久立釋公且賜鈔萬貫旌其廉巡撫河南時會  
汪直至他巡撫率屈禮公獨與抗密疏直多帶旗校擾地  
方直還上問各省撫臣賢否直獨稱公廉能上出公

疏示直直頓首伏罪。益稱公賢。弘治三年。以右都御史總制兩廣軍務。破岑欽。鷓鴣嶺走匿泗城。遂克田州。又破海南黎。及龍水。後山賊。四年。勅總兵安遠侯柳景貪不法。逮景下刑部獄。追贓鉅萬。褫其爵。景得內降。減贓。因換他事。誣公亦被逮。坐免臺諫。交章論救。上報聞。三原在吏部。極言公廉直忠信。不可棄。內批南戶部尚書黃紱改南左都御史。公代紱。南戶部尚書八年。乞致仕。不允。十一年。致仕。十四年。虜報急。以王忠肅馬恭襄故事。召公戶部尚書。兼憲職。巡撫陝西。十五年。總制陝西三邊軍務。整花馬池。鹽課。買馬。開豫望城屯田。先後斬首九千。修城堡。開窖一。

萬四千所。剗山崖三千里。十七年乞致仕。不允。加太子少保。是歲革總制。召還部。辭得致仕。十八年年八十卒。贈少保。謚襄毅。公剛毅廉介。歷官四十餘年。提兵南北。列位孤卿。所居僅蔽風雨。妻孥菜羹麥飯。不改其舊。逆瑾專政時。公義兒丁玉與公繼妻弟楊瑾爭訐。楊瑾因誣公子。畔有資萬計。逆瑾喜。卽籍公家。無所得。

太子少保鄧襄敏公

事

景帝  
茂陵

祿陵

公名廷瓚。字宗器。巴陵人。景泰五年進士。爲淳安知縣。問民疾苦。專施惠政。不求赫赫名。終九載。無知者。兵部尚書張鵬時以都御史巡撫。薦知梧州。會母憂去。貴州程番府。

在萬山中夷獠雜聚難治公知程番悉心規畫凡城郭街衢廟宇廨舍以次興建榜諭諸夷使受約束政令公平莫不感悅墾田不踰界入市不二價四境晏然蔚如中州後巡撫貴州適黑苗久叛勅公往視兼提督軍務初撫不從始合衆謀調兵食決策征勦兵至其地號令嚴明將校用命斬首六千獲二千械首惡俘京奏言都勻清平舊設二衛所屬九長官司其人世祿驕縱稔惡釀患致夷人侵田奪貨已四十餘年軍疲於戍守民困於轉輸今幸黨惡消除非大更張不可條上十一事下兵部議行始設都勻府一獨山麻哈州二清平縣一更設流官與土官兼治以右



副都御史召入臺。未幾出鎮梧州。兩廣自成化初。韓襄毅平寇後。開府梧州。率以憲臣有才望及官高者。總督軍務。兼巡撫。公性不瑣瑣。益思安靜。屬吏有賢者。輒薦舉。或不職。特去一二太甚者。顧羣蠻以劫掠爲常。往往出沒閩楚。諸郡公言。都御史金澤巡撫偏方。非宜。宜以江西一省付澤。使二司聽節制。度軍馬錢糧。可以調度。至於湖廣。衡州設兵備。憲臣遷治所。柳州便。又以廣東龍水爲賊巢。宜卽其地設千戶所。調軍守禦。仍宜給隙地屯種。爲久計。公於羣蠻結以恩信。兵不輕出。出則成功。若鬱林川雲。鱸大桂。諸種作亂。以次討平。其後四會諸下縣。饑盜竊發。勢尤熾。

公斬獲首惡李景光、覃潔及其黨二百餘人，餘悉解散歸農。卒，贈太子少保，謚襄敏。兩廣總鎮又有桂陽朱英，正統十年進士，初爲御史，禦賊葉宗留處州，効外戚汪金內臣善增陞廣東叅議，葉文莊公每事詢英，叅政陝西，調兵食，征固原，巡撫甘肅，條邊事，陞兩廣督撫，專意安輯，民得休息，流入復業者十五萬家。出入十年，召入臺，加太子少保，卒，贈太子太保，謚恭簡。英性度宏暢，才識通敏，剛介而仁恕，所至有惠政。

太子少保童公

事

景帝

裕陵

茂陵

公名軒，字士昂，故鄱陽人。父碧瑄，以精天官學，占籍南京。

欽天監公幼穎敏讀書過目成誦以景泰辛未進士拜南  
京吏科給事中、公思舉職深居簡山不妄與物接嘗上疏  
言省冗員、公考察倡武勇、擇師儒杜倖進恤京民又言南  
京羅貴民飢請命官賑之、俾御史體察多見採納時詔  
南京守備採辦翠毛魚鮓諸物以萬計公極言止之、英  
廟復辟覽公奏嘉其敢言尋上疏言弭盜安民數事尤切  
時弊天順己卯以嫡母艱歸服闋改戶科給事中癸未同  
考禮部會試得倪公岳輩十數人時稱得士、憲廟踐阼  
公首上疏言帝王之治當知本末隆聖德用賢才納忠諫  
愛小民謹邊備本也而簿書刑名其末也願時引儒臣謹

求祖宗謨訓及古帝王修身用人之道推而行之則聖德隆命在廷三品大臣歲舉堪任方面一人且嚴連坐之法進用大臣亦召三品大臣於便殿各舉一人不當者科道糾之則賢才用臺諫之言賞其直貸其過則忠諫納養民之政在戶部凡奏報災傷卽加優恤則小民安多方求將歷試所長文武有犯輸粟于邊則邊備謹上優詔褒美並下諸司舉行之公又言漕河爲官舟所阻請命大臣督其事仍乞省貢舟而嚴禁之未幾四川盜作命公往撫公至遍歷賊巢宣布恩威諭以禍福賊首王應高等聞公名羅拜乞生悉慰遣之夏六月進都給事中會賊首趙

鍾惺不聽撫、旋復叛去。公偕鎮巡三司分兵勦捕、躬冒矢石、斬獲無算。凱還蜀、人繪班師圖紀焉。明年夏、四川巡撫言賊復猖獗、委咎于公。且議出師。公曰：賊已平、奚用出師？不數日、捷奏果至。猶坐言者謫。浙壽昌令已丑入覲、上疏自理。廷議以爲寬。於是宗伯姚公薦改公僉事、督雲貴學政。公精于考校、隨才造就。士風爲變。按臣交章薦公。召拜太常寺少卿、掌欽天監事。公嚴考天文諸生。公僚屬之薦省曆紙之費、夙弊一清。已亥夏、進太常寺卿、仍掌監事。敎諭余正已奏言曆法之差。上命公與之考論。不合。公上言歲差置閏其來已久、我朝考曆制象尤爲精密。雖日月

薄蝕不無先後畧刻之殊分秒多寡之異則以土有南北  
高下故耳正巳乃謂天地有自然之冬至以至朔望置閏  
皆非人力可爲是不知古人以數求天之術顧以小智亂  
成式宜下之吏以正其妄從之復正天下陰陽官納累免  
考非制癸卯春予告歸日日蕭然一室非知舊不輕接納  
縉紳重之弘治改元會欽天官以不職罷衆復以公薦命  
仍掌監事夏六月日有食之公言日食紀元之初當盛  
八旺之候宜修身窮理進君子退小人以謹戒尋辭  
文舉吳吳張紳高鍾自代是冬進右副都御史提督  
平務兼巡撫時蜀歲侵公首舉荒政設粥以待飢饉

檉以歸流移平訟以決久禁先是久旱公至雨亦隨足乃爲禁令三十餘條皆安邊保民之政復以南路鎮番一帶苦蠻夷出沒歲減軍糧備犒賞非計奏以四川官帑銀布代之戎卒乃安公復以其地險遠蠻夷雜居疏言松茂威疊戍守甚艱而疊溪一路尤甚宜調兵設衛令一都指揮守之四處要路各設一倉以便轉輸令一布政司官督之復言沿邊徧所州縣皆在萬山中關堡與蠻夷共有害而無利宜捐松茂中羊腸一線之路則關堡倉廩可減兵無遠戍之勞民省轉輸之苦蠻有坐困之機凡八害三利畫一以聞事下所司議行嘗創兵器給諸關堡爲禦敵具

薦按察使林俊可任中丞時論黜之辛亥晉南吏部右侍郎甲寅夏進南禮部尚書累疏乞骸骨上再四勉留公力陳數千言謂朝廷大政闕門一議不足決是非宜如古公卿大夫各得獻議以俟采擇未幾以疾卒贈太子少保公身若不勝衣強學好問至老不倦爲文淵博雄麗詩有唐人體裁書學遒勁見者寶藏之性孝友事嫡母夫人備極色養分祿以贍兄嫂撫姪靈及諸孫應禎皆有恩平生喜賑人之急而自奉蔬食水飲泊如也顧司寇璘作鄉正篇以訓士云公擇地而蹈擇言而出吐辭濡翰必輒其方慎哉愿乎君子以爲知言所著有清風亭藁枕肱集海岳



涓埃諭蜀藁、壽邊錄、夢徵錄、各若干卷、藏于家、

尚書何文肅公

事 景帝 裕陵 茂陵

公名喬新字廷秀、廣昌人、景泰五年進士、父文淵進士、嘗知溫州府、廉靖平恕、召入刑部爲侍郎、請告歸、正統中、薦起吏部侍郎、景泰中、進太子太保、佐王直同爲尚書、被劾致仕去、公初主事南京禮部、歸葬父、卜地不得吉、會宋樞密陳文定公葬父廣昌、子孫貧、欲粥其葬地、衆謂此吉壤、公曰、暴人父而葬吾父、吾不忍爲、按察副使福建陞河南按察使、諸貪殘吏倚強援莫敢詰、公盡鑄暴坐法去、撫戢南陽山谷流民六萬戶、陞布政使湖廣、成化十七年副都

御史巡撫山西督三關兵事虜自河曲入塞急遣伏兵灰溝旁斬虜大敗去召入刑部左侍郎虜酋擁衆寇大同殺邊將紫荆居庸告急勅公巡邊遣謀覘虜營聲言遣兵搗其巢虜懼不戰遁去播州宣慰使楊輝嬖妾乃寵其子友欲奪嫡于愛諸小酋不肯從輝矯奪大壩鎮筭諸夷寨立懷遠宣化二長官司又割播州凱離五十二寨設安寧宣撫司立友爲使張都御史輒爲輝畫請得旨會愛母友友母益橫誣愛反交通唐王朝廷疑愛遣公卽訊友母子又輦金寶賂諸權貴人欲公因愛衆籍籍爲友遊說必欲去愛公至盡得友子母奸惡罪條上曰愛無反謀革友宣撫

削官銷印、遷保寧、與產業自給。播州遂定。陞南刑部尚書。  
疏奪內臣守備蘆洲還民。

秦陵初召公刑部爲尚書。上疏乞禁京師胡服。胡語。鄒御史  
史者鹵橫欲躡得大理丞。公薦曲阜魏紳郎中。鄒御史恨  
公會公外氏與鄉人訟。卽誣公得金錢與行賂。輒上下其  
手。要地人又從中主之。公杜門引咎辭位。下諸根連人詔  
獄窮治無踪跡。公雖湧白。竟不安其職。請老去。公卿臺諫  
交薦起公。竟不得卒。後江西巡撫林俊論公文行政節。應  
謚法得謚文肅。公守官清慎。律已方正。事無難易夷險不  
避嫌怨。必行其志。

都御史高公

事

景帝

裕陵

泰陵

高明字上達，貴溪人。景泰二年進士，爲御史，巡河南，糾斥不職吏六十餘人。會黃河南徙，民耕淤地，畝收歲數斛，議者欲履畝坐稅，公不可，曰：「河徙無常，稅額不改，平陸忽復巨浸，常稅猶按舊籍，民何以堪？」天順四年，御史趙明等疏劾來朝吏語觸上怒，詰疏出，誰公任，實草疏。都御史寇深言累年奏牘皆屬高明，乞貸明過。上怒亦解，顧喜公曰：「高明能御史，先是公劾兵部尚書陳汝言，怙勢納賂，下獄死。汝言潼關人，代于少保爲尚書，不數月奸贓萬計，誅石亨公及門達籍，亨家公言亨無反謀，蒼頭得免，次者百

人鹽山薦陞山東按察使。上謂南陽曰：高明宜內用。又謂寇深曰：高明可都御史。南京南京久弛縱，公振綱紀，劾罷諸貪殘吏。揚州鹽寇起，守兵失利，勅公勦捕。公造巨艦，榜籌亭，往來江南北督戰。又授方略御史戴琥，顧以山擒賊九百餘人，並江置邏堡。高山望候賊出沒露踪跡，不得逞。江海間稍靖。中官粥私鹽，縛儀真指揮羣卒大開，公盡籍其鹽，劾中官。又條劾戶部及諸巡撫縱法狀，及陳利害十餘事。衆始忌公。公亦三疏請終養。成化二年，上杭賊起，卽家賜公勅便宜討賊。公力疾赴闕，先諭撫賊降。賊恃險不應進兵，搗其巢，大破賊，俘四百人，誅渠魁十一，餘並

輕坐析上杭溪南里爲永定縣控賊海口民矯令募亡命  
謀不軌公不欲再起大獄或至用兵坐誅妖言衆遂定卽  
上疏乞休納符勅去嘗曰孔殘三宜去司空圖三宜休吾  
無才一宜退有病二宜退親老無兄弟三宜退及治盜徵  
宜再起賊平疾作宜再退自稱五宜居士公天性孝直俊  
暢有通才難進易退出處皦然